

四庫全書

集部

欽定四庫全書

集部  
柘軒集卷三

詳校官太僕寺少卿<sub>臣</sub>李廷欽

中書<sub>臣</sub>劉源溥覆勘

總校官進士<sub>臣</sub>朱 鈐

校對官中書<sub>臣</sub>牛綏文

謄錄監生<sub>臣</sub>朱 昇

欽定四庫全書

柘軒集卷三

明 凌雲翰 撰

五言長篇

七月朔壽徐大參五十韻

光嶽千年合車書萬里全天開斯地闢主聖自臣賢有  
美生人傑由來擊數淵景星方快覩時雨必開先盛世  
逢三五賢人出半千黃岡饒巨竹赤壁亘長烟物論咸

稱首才名孰比肩傳芳由栢業體道契松仝大厦須梁  
棟前賢賴簡編玉壺澄皓月清廟永朱絃書豈陽冰亞  
詩應子美專威儀疇若此閎闕固依然遠借長風使親  
承湛露涓一麾初出守百辟共朝天履聽星辰上光分  
日月邊豈惟衣服袞端有筆如椽版籍登民數絲綸振  
吏銓玉文龍矯矯紫誥鳳翩翩御酒浮巵滿宮花插帽  
偏階辭天表近帳阻地隅填野色明朱紱川容動彩旂  
地連淮海外省鎮浙江堧奕奕三台位煌煌五緯躔陰

陽資變理封域待旬宣丙魏蕭曹接韓歐富范聯政刑  
隨日化風俗與時遷析木初飛鵲高槐尚噪蟬今朝雲  
郁麗後夜月嬋娟弧矢逢華旦椿楸見大年秋期先六  
日佳氣藹初筵壽域宏千里春臺廣八埏正名恢樂地  
種德布心田鵷鷺思同列麒麟喜滿前豈無瓜似棗亦  
有藕如船仙鹿銜朱草神龜上碧蓮歌憐鶯睨曉舞愛  
鶴翩跹自有青雲器仍兼紫府權勞謙延下士致泰啟  
重乾事業期周召文華繼許燕公其為輔弼走也與陶

甄有道千鈞重無私一鑑懸考功齊郭令論表擬彭錢  
愈覺勲庸盛尤知志操堅作興周禮樂整頓禹山川已  
注長生錄當為不老仙未容居綠野寧許見華顛素積  
陰功厚能同造物旋偕行追九老衆妙入重玄欲祝先  
天算還歌七月篇願言多壽祉流慶日綿綿

七月流火

人間逢七月大火向西流民事終嫌晚天時始應秋三  
星低北戶萬象拱南州箕尾同成緯珠璣異綴旒金波

分穆穆銀漢與悠悠類燭輝瑤席疑螢度玉樓色連朱  
閣迥光動翠簾幽栗烈將催候晶瑩故眩眸氣隨霜露  
變事逐歲年道布帛堪為褐狐狸可製裘先時還有備  
卒歲每無憂偶讀幽風作端為大業謀願陳忠厚意萬  
一貢皇猷

葛孝子詩五十韻

古云孝悌至可與神明通其深入厚地其高亘蒼穹上  
廣聖之治下變時之雍流觀孝子傳乃見古人風保定

地清遠形勝當要衝天民有苗裔良知有孩童氏續并  
州疆道繼勾漏洪溫其玉出璞爛兮金在鎔豈惟竭其  
力亦復殫其恭堂前荆樹紫階下萱花紅身無千鍾祿  
心有一寸彤板輿快秋爽萊服明春濃常存懷橘念每  
感斷機功覆杯戒前日溫席當嚴冬但知子力盡孰計  
時運終王綱一解紐四海皆興戎無城不兵甲無地不  
燧烽南方亂豺虎中澤飛鴈鴻堪輿豈不大倉卒難為  
容他山號明府拔地多奇峯避難屢躋險充饑恒致供



俄然大風作出自空谷中其行若有隧其孽為召兇亟  
思逃匿地庶保聖善躬竭來衆黔首過半摧霜鋒生還  
訪故里舊業無遺蹤所恃靡毫髮惟孝持心胷神忽憑  
姬體言猶在人聰汝能篤以孝吾斯啟其衷非為一時  
幸永俾後裔隆易水流湯湯金臺屹崇崇豈無慷慨士  
亦有文章公皆言葛孝子不愧江次翁官將立華表人  
豈棄黃鍾繡衣行薦鸚彩筆競雕蟲為親捧儒檄講道  
居黌宮遂令燕趙俗直與鄒魯同忽罹陟屺戚已從若

堂封哀傷動桑梓悲慘連楸松誦詩後蓼莪讀禮先檀  
弓深戚養之薄殊勝祭者豐端因事跡美益見傳語工  
聖世惇孝悌淳風邁義農車書混文軌聲教漸西東孝  
子復有子承宗亦興宗梧岡孤鳳鳴栢府一馬驄移悌  
為長順移孝為君忠垂名照青史應瑞踰黃琮我歌孝  
子詩錫類期無窮

顧定之墨竹

淮南善畫竹其世宗虎頭前身蕭協律後身文湖州濃

墨逼景獻健毫從澹游清如李息齋勁若柯丹丘子昂  
固莫及仲敏或可侔素得金錯法向背分剛柔興來祇  
一掃揮處踰雙鉤雨葉已籠夏風枝仍報秋遂令愛竹  
者不必穿林幽嘗聞維摩像神光燭遐邇何如君子容  
蒼顏照清流胃中有渭川湛水同悠悠載歌瞻菴詠吾  
其企前修

為華子宜賦山隱

招隱何處所宛在櫟山岑人同西嶽踞地異真源尋履

隨綠玉枝冠映青瑤簪蘿月炯顏色松風灑塵襟鍊液  
變白雪燒丹成紫金傳授龍馬圖嘯歌鸞鳳音稽首希  
夷子寥寥同此心

沈紹宗東園軒

隱侯美孫子學古將入官長以空洞腹負此苜蓿盤軒  
東地頗衍日出作愈艱偶得樹藝術永充朝夕簞種蔬  
不欲密瘦地方易殫種蔬不欲稀糲食味易闌學圃固  
云陋灌園乃所安杞菊春可攬葵藿時加餐之子方挾

策同寅侯彈冠不愛東門瓜不愛九畹蘭愛此菽水奉  
宜爾萱親歡有圃當耕耨有田可遊觀一朝蠖之屈九  
萬鵬斯搏相期閭風上高步青雲端

半閒道人畫卷

餘杭佳山水我昔曾一遊緬懷丘園意自得林塘幽映  
門盡嘉樹隔岸皆平疇豈惟慕巢許亦復談伊周毋以  
半閒號忘此終身憂苟懷豫逸志不與乾剛侔願子慎  
明德勗哉企前修

雲林小隱為崔彥暉賦

白雲何英英蔭此嘉木林雲氣有舒卷林木恒蕭森久  
矣慕高躅於焉遂初心舉頭弁山高濯足茗水深草堂  
自秋爽松廳空夕陰冥鴻飛避弋野鶴下聽琴載歌招  
隱章重賦歸來吟白駒在空谷毋遐金玉音

靜齋詩為朱君政賦

幽居絕塵想衆山羅其前緣好得深造以寂成靜專齋  
虛室生白宇定光燭天罷琴掛空壁熏爐玩遺編荷涼

下飛鷺槐暑來鳴蟬悠哉歲月外闊焉天地先昭言紫陽  
氏保貞期永年

敬義齋詩為金華吳景昭賦

齋居抱冲素蕭然潔塵襟斂收學乃臻馳驚志益淫斯須  
起一髮俄頃彌千尋疇知主宰功宛在方寸心靈扁異蟄  
戶廣術非蹄涔惟茲敬義立翼若神明臨金華延陵裔元  
守翰墨林韋編日孜孜碧牕晝陰陰履道固云坦浚德斯  
其深嗟予坐狂斐得友期規箴永言直方理庶播金玉音

鄱陽王節婦詩

朝華夕已披春葉秋先零貞心類松柏歲晏彌青青文川李  
氏女防身動如經自歸太原家目不窺外庭上堂問舅姑下  
堂觴醕醑遭時有戰伐渭流濁其涇草竊起旁郡黠黠雜羶  
腥舅也保鄉里擊賊無留停夫也慎居守率衆環郊垌節婦  
當此時事姑肅儀刑舅榮夫已亡痛哭羸其形先有兩兒女  
玉雪憐娉婷與姑共撫之閉門晝長局奈何姑繼歿隻影空  
伶俜尚職祭祀禮蘋蘩薦芳馨教女夜績麻教兒夜囊螢父



母雖孔邇胡能自歸寧今年五十餘鬢髮微星星兒成女有  
歸往事猶夢醒有司重節義飛章上朝廷花誥來翩翩華表  
高亭亭行者為歎息居者增晶瑩至今太原家芳名藹觀聽  
人生諒有涯聚散如雲萍綢常苟淪喪不愧天地靈女史固  
有箴列女亦有屏我歌節婦篇君子當刻銘

海陽子詩為李彥實賦

晨興候沙際望見蓬萊雲蓬萊渺何許稽首雲中君曜靈登  
扶桑舉世知為所中天撰龍轡六合無囂氛云何海陽子未

謝沙鷗羣觀水必觀濶獻曝同獻芹望洋昧所覩逐影徒為勤積流成大川學古求多聞寸陰聖者惜子當惜其分

牧隱詩為李文照賦

川原澹微風草色綠以齊牛羊散平野欲與蒼烟迷麾肱畢來升鞭策何用携所以隱君子於焉記幽棲朝牧日在東暮牧日在西爾羊無百尾爾牛無千蹄對之忽兩忘俯仰惟端倪因之崇隱德豈顧犢與羝

贈醫士沈士貞

庖丁能治牛師曠能治音疇知扁鵲術異跡同其心五  
行播四序偏勝恒為淫奈何叢爾軀禦此寒暑侵岐黃世  
云遠與義難重尋長沙繼扁鵲論議橫古今不有劉張從  
奚辨石與琳錢唐醫之數名士朋盍簪惟茲隱侯裔聲價  
兼南金厚施遠食報券積高於岑竭來金閨彥有疾虞將  
深神丹進刀圭捷若磁引鍼功成不受餽拂衣歸茂林我  
風慕其人與語開塵襟安得雙鯉魚為之溉金幣盡詢養  
生秘啟我聾且瘖會面諒可期因風寄長吟

懷雲軒圖為王子中題

嚴親在高堂征夫在天涯所以於此時瞻雲每興懷念子失  
怙恃悠然坐松齋感此無定姿邈若音容乖四方及上下悵  
望胡能偕因之為此圖氤氲抱丹崖似當日之夕山氣何其  
佳顯親繫揚名古訓期勉諧願言作霖雨行當詠三槐

聽潮軒圖為夏伯玘題

觀水必觀濶聽潮每聽音乃於無聲處見此天地心方其潮  
未上大江一蹄涔將耳欲聽之寥寥杳難尋及夫潮既落洶

湧成消沉又復以耳聽默默真如瘖惟於初至時闔闢  
陽與陰吹地殷鞀鼓從風鏗鐵金之子於此軒危坐正  
其襟悟茲寂感理閱盡古與今已無言語述況著丹青  
臨我聽不以耳孰知聽逾深擬將希聲意寫入無絃琴

仙山訪隱圖

仙山渺何許飛樓跨蒼穹誰携九節杖直入烟霞中雨  
餘千澗急畧約微徑通松花落金粉衣袂回春風幽懷  
何以寫奈此爨下桐吳江脫屣後不逐陶朱公還來白

雲裏揮絃送飛鴻，苔溪隱君子苦心。乃良工五嶽在隻手，三山入雙瞳。每於生紙上經營，意無窮。我知圖畫理，能使塵慮空。胡為效病鶴，偃促遭樊籠。何當賦招隱，山幽多桂叢。

布穀篇

鳴鳩本鵲鳩，形狀鵲鳩殊。江東呼撥穀，布穀江南呼桑間。拂其羽，長與戴勝俱。一鳴雨霖霖，再鳴雨霑濡。三鳴未及已，驚起耕田夫。扶犁乃畢出，荷鋤爭前。

趨我聞少皞氏鳳鳴來應圖紀官此司空信為德之  
符願言反淳風聖世躋唐虞持此鳴鳩篇遠獻王者  
都

藹萱堂詩為夏伯玘賦

藹藹堂下萱藹藹枝上花豈無衆草木獨此能榮華况  
當朱明候連續開丹葩蜻蜓飛南圃蝴蝶飛東家何如  
小尾蜂朝暮報兩衙寸心固云殫慈母恩無涯錫類古  
所敦永言非重誇

雪樵為吳江謝聘之賦

大雪滿天地山林何所樵不辨凡草木但見英瓊瑤  
瑤固云美政恐難琢雕草木亦已落猶存舊根苗  
屬禁苟不廢庶可成天喬奈何旦旦伐無異見覲  
消惟茲謝家樹松柏見後凋昔宰安丘邑今泝浙  
江潮手板方釋手腰斧仍在腰棟梁尚可得榱桷  
不待招所憂歲年晚雨雪恒漙漙蕃鮮回玉燭光  
華麗璇霄四海一靈囿君其老芻蕘



谷隱為鄭元諒賦

西都方邁，患鳳兮歎德衰。谷口鄭子，真于焉少。栖遲躬耕，本逃名雄也。反譽之，雖違括囊意，庶合知幾辭。如何定山陽令族，適在茲隱德。尚先世食粟，非茹芝黃鳥。忽嚶鳴白駒，當繫維所以。龐德公終為隱者師。

駕鵞篇

美鄒節婦也

潁水白於練，芳池成委區。濯濯出水蓮，寧受塵垢污。駕鵞忽飛下，雌雄日相娛。惟唼池中藻，不銜池上蘆。惟偕

池中鯉不雜池上鳬霜風一夕發池荒蓮葉枯雄者方  
垂翼雌者已就殂睢鳩知有別精衛志不渝物性固莫  
奪民心焉可誣至今南岡樹落月空啼烏

簣軒為吳兼善賦

青山映華軒牕戶何玲瓏鳳鳥久不至簣簣自成叢之  
子延陵後讀書此軒中晝陰兼夏綠古色謝春紅心虛  
事恒集本立道自充投竿出鱗鯽炙簡祛蠹蟲敲門思  
有待題句慚未工安得文太守深谷寫高風

報德詩為郭伯瑄賦

朋友死無歸殯之諒非艱能於賢者施大勝獨與鰥賢  
者亦有子兵亂不得還亂定子方至臨穴出涕潛報德  
斯以德不在文字聞文字苟不泯世教誠相關道山鬱  
嵯峨茗水流潺湲相去數千里可望不可攀一朝函骨  
返無復萊衣斑子固有戚容人亦皆歡顏民胞物與意  
砭訂愚以頑嗚呼子深氏義重踰丘山

送李守約

清商變炎景蘋末回高颺之子有遠行方舟已齊橈茲  
行何所之鍾陵鬱嵒羗于時際昌運四海胥來朝嚴君  
仕王家玉珮聯金貂豈不有所懷悵望川原遙今辰復  
何辰草蟲鳴要要感此秋氣集頗覺心旌搖趨庭會有  
期儼立英瓊瑤出門道可由進學德乃昭去去當努力  
焚膏永涼宵

康上人畫

二首

林扃掩孤寂落木無餘聲道人坐空山那知歲崢嶸夜

寒牕有雪漸與茅屋平不悟梅花開但覺鼻觀清殘經  
未能了映隙窺微明願以第一義於焉證無生

右雪牕玩梅

山雲有幽姿南塢春更好鞭起露地牛布種皆藥草寧  
辭袈裟單但恐稂莠惱根莖固云殊所貴辨之早況以  
梯稗秋每食敢求飽感茲澤物功童閒不教掃

右南塢耕雲

送趙永貞改丞德化縣以萬水千山路孤舟幾日

程為韻

郎官宰新邑別酒須更勸隨行但琴鶴況乃僕夫健擔  
簦與負書累憊不知倦于時春已闌花卉雜藤蔓丈夫  
貴逢時進尺從退寸鵬程從此開搏風當九萬

又

萬方既寧謐二老亦興起皇風播九州賢路隘百里錢  
唐雖古邑人民半凋毀持危與扶顛非公疇可倚胡為  
移他邑又使風俗美貳丞何人斯譜乘自天水

又

水流必赴壑况乃值大川偉哉朝宗意浴日乃滔天昨日哦庭松今朝犯蠻烟皇威遍四海所見如目前勿謂道路難民事在所先會看一士謬當勝諾者千

又

千里復萬里道路多間關况復春盡時好鳥聲綿蠻賢宰離舊邑車轅庶民攀貳事非敢專亦當念惇鰥過期構大厦寒士皆歡顏去去不可留悵望空雲山

又

山雲無定期水月有真遇叔度雖云賢來時奈何暮今  
辰復何辰送別江口渡俄然發棹歌驚起沙上鷺名儒  
為席珍猾吏乃民蠹百里勿謂卑從茲啟賢路

又

路人為我言行者方載途如何賢貳宰征馬思南徂有  
穀盈我俎有酒盈我壺飲食非所念所念民力劬官府  
有賢良庠序多範模為政雖云艱要在德不孤



又

孤雲在天末可望不可留昔何為而歛今何為而浮一  
朝從飛龍變化彌九州應知三農意翹首待有秋沛然  
作霖雨江漢皆同流願言乘長風濟川有虛舟

又

舟行何遙遙南風颺旗尾江上無雜花青青盡蘆葦于  
時潮已平波動日光煒中流雙艣鳴愛此兒郎偉餞行  
豈無詩成章愧其斐會看展驥足如公信無幾

又

幾年客燕山問學疇與匹貳邑來錢唐吏事師儒術邑  
庠久荒蕪赤手建宮室不有經濟心成效安可必勛哉  
教養功為事貴其實鳳鳥寧卑棲朝陽待他日

又

日出春霧消江頭潮水平舟人理輕棹送客聯諸生州  
縣雖徒勞由茲至公卿仁愛在民物舉世皆和亨請看  
蕭曹業承作邦家榮南溟豈不遙萬里開鵬程

奉和許彥章檢校陪祭有作三十韻

學古始入官為有民社寄此理均人臣矧職居相位祀  
典遵百王法守由一揆丘陵以為壇陶匏以為器既嚴  
神祇稱復辨上下次成象本乎天成形本乎地牲牢貴  
腍充禮樂尚明備瞻仰民所崇財用國攸繫兩儀同乾  
坤七廟異渙萃日臨齋戒期卜叶享祀利不愆斯不忘  
能備乃能祭皇風浩無垠盛世寧有替于時蟄蟲驚應  
候玄鳥至風霆為昭明山川載神氣鏗鏘鳴鼓鐘秩秩

陳簋簋翩然雲之來允矣誠所致有美文武臣夙抱純  
一志燎明夜向晨月白天在水鵠立儼當中駿奔走其  
際欣欣神樂康簡簡福相熾湛露流玉階冷風襲瓊珮  
方當感格時已著充滿意禮行士無譁樂奏神所蒞益  
之以十朋介之以繁祉祈報止春秋敬恭止壇壝玉燭  
一鼎調金成萬寶遂三獻迄有終九府均被賜豈期康  
衢民獲覩放勲世雷動車馬還日出海波沸作詩聊記  
年皇明甲寅歲

南山紀事詩為楊復初賦

子雲每好奇招我遊山澤偏茲會佳趣歷覽盡幽僻  
維揚有崇山日出烟霧隔窮探不知遠但覺多塞阨  
縈迴林麓深窈窕蹊逕窄陟岡縱竒觀未至心已懌  
屹然峙浮圖天孤一峯碧百折乃肯下磅礴勢辟易  
前面蒼龍首後負靈鼇脊雄踞虎妥尾雌伏鳥斂翮  
地勝氣所鍾土色狀琥珀上有百歲梅下有千歲柏  
左右脩竹林森森列矛戟乃於隱約間凝然結幽宅

不知何人地欲問山中客同遊忽告予先人此窀  
穸為言經營難小立話疇昔茲山萃精藍蟠據無  
罅隙惜土如惜金誰能此藏魄憶昔先人存頗有  
風水癖偶讀青烏經遂識來龍脉窮探得茲穴屢  
請竟莫獲因之號南山以志聊自釋神遊心不忘  
遺命在易簣再請拒益堅衷情徒內迫負愆背若  
芒失措手猶螫三年讀禮經方寸恒戚戚昨承郡國  
薦專教上海席世變之京師所歷倍艱厄親骨未入

土此實人子責匪惟熱中腸亦復泚其額還家踰一紀  
終請始不惜方將擬封樹詎意遠行役及歸歲云暮故  
地啓新闢俄於畚鍤下石露見刻畫三復穆陵詩摩挲  
出圭璧若曰風雨寒草草奚所適重約舞鳳笙遲歸在  
朝夕昔藏事已非今復語可繹百年如合符此理疑惑  
格願徵先生言庶為生者益我觀孝子志百順無一逆  
臨事苟獲為努力甘毀瘠於心或有慊神明諒能謫如  
子克奉襄衆指見巨擘古來卜吉事往往著簡冊致烏

表清忠眠牛發陳迹佳哉滕公城欲墮王果石子也慎  
其終令聞永無斃勿謂經營難餘慶善所積

贈潘德厚

洪武戊午秋佳辰又重九門前冬青樹想像如五柳中  
有避俗翁於焉養衰朽俄聞扣門聲乃見二三叟水心  
吾忘年虎頭吾畏友偶偕安仁裔所見知所守湛然若  
淵泉溫其類瓊玖云是主粟官才能世無偶奔走事先  
集易若屈伸肘杭郡冠東南倉廩過陵阜出納既有程



經營亦非苟尚不遺撮圭况乃累升斗昔聞閒居時板  
輿奉慈母郡國舉孝廉惟汝獨稱首賦詩中書堂落筆  
海潮吼青袍方裹身美譽已騰口祿仕安敢擇所貴為  
母壽奈何不及養中心記能剖今年屬免喪文字復徵  
取請解來錢唐見者惟恐後書成華其行河橋重携手  
從茲到三泖湖水清且瀏鱸魚入板罾香粳出春臼因  
之作畫圖可以識某某示我索題詩成章愧呈醜胡能  
繼殊珍但可供覆瓿譬之多稼田也復容稂莠恭惟聖

明朝文化被九有圖書出河洛麟鳳在郊藪貂蟬變兜  
鍪金印聯組綬賢者屹山嶽能者環崕嶺芄芄棧樸姿  
爾在薪與爇嗟我晚聞道傾蓋蒙發薜登臨此日同留  
別不能久贈以黃金花西風一杯酒

辛亥歲秋簾分韻得上字

明時聖主作文治在所尚聲教極被漸輿圖混輪廣科  
目網多士網維屬良相朝廷盡明揚巖穴竭搜訪世豈  
乏棟梁意在得工匠棘闥重開設茅拔皆聞望有來君

子儒皆為丈人行校藝辨妍媸立言關得喪豈無歐  
蘇出敢與晁董抗再鼓勇諸生三歎永一倡易書本  
黃虞禮樂宗素王論或準賈生騷豈比荀況神奇化  
臭腐蠱洗見盆盎金鏞或在懸玉卮恐無當治音貴  
和平贅語刪冗長細句獨繭抽雄篇怒濤漲千軍期  
獨掃百川可東障措辭喜華麗素質陋木強有美鳳  
鳴岡無取馬立仗撫序漸蕭條舉目忽清曠河漢澹  
微雲天雨絕纖埃月色秋正佳濤聲夜逾壯簾風亂

星燭簷露襲斗帳蟋蟀已居壁莓苔欲侵桁念茲  
歲如流毋使情益蕩誰謀免三窟能著屐幾兩千  
慮有得失萬事付遺忘為學竟荒唐捫膺益惆  
悵崑崙有丹丘蓬萊有方丈願接盧敖遊相期九  
天上

雪竹軒圖為彭彥明賦

北風天大寒平地雪三尺蕭然軒牕外見此萬竿碧此  
君有高節豈但密如簣類彼軒中人相看共貞白誰云

作此畫光景照几席形神恍其間那知故園隔豈無九  
節杖亦有雙蠟屐清興如可乘山陰訪陳迹

松雨齋為胡拱衡賦

西山澹幽姿脩者亘天宇飛來石上雲散作松間雨前  
聲猶淅瀝後勢稍軒舞風驚八月濤地裂萬雷鼓斯須  
籟盡息慘淡形可覩誰謂工之良自覺心也苦於焉名  
齋居允矣好奇古願交謫仙吟因之夢天姥

竹居為張行中賦

我觀隱者居種竹皆遶屋無竹俗其人無人俗其竹紛  
紛迷籬籬往往遍林麓豈不懷渭川因之詠淇澳如何  
一丈地有此數竿玉遂令蓬蒿室便擬簞簞谷笋出親  
可供充庖勝野蔌葉落童自掃燎釜助山木祗因幽事  
關頗覺生理足夜眠聞秋聲曉起見寒綠繁欲加斧斤  
因或資簡牘會當留高枝他年鳳凰宿

蘭雪齋為沈德源賦

猗猗谷中蘭粲粲叢上雪春風有時來綠艷終不滅志

士多古懷君子有貞節於焉抱清潤允矣全脩潔孔操  
寡知音郢歌謾成闕興言得同心援琴寫幽咽

送曾子員歸廬陵侍親

潛魚無揚鬣歸鳥有歛翮物性安固然誰謂天地窄要  
路多通津高足諒且策嚴親已華顛胡為事行役寧食  
青原菽不食薊丘麥寧飲桂溪水不宿燕市驛昨暮寒  
蟬鳴今晨歸騎迫欲採芙蓉花難以遺遠客賴有和陶  
辭因之慰安適子道在養志竭力甘毀瘠錫類古所敦

相望海雲隔

畫芥 二首

芥能清我心助養頗為急春畦雨露濡根葉每霑濕園  
丁亦云勞小摘日供給燥吻殊可憐時時啜齏汁壯年  
功名心青紫如地拾誰言納須彌祇用子一粒披圖見  
紛披胡為在原隰歲晏思灌園抱甕當日汲

又

高田宜種蔬下田宜種穡歲饑與飢同安敢望肉食雨



餘理荒畦甲折資地力會看根本長取之戒勿亟天公  
憐我貧此物頗不嗇便如終歲謀十甕擬可得今笑披  
畫圖流涎欲霑臆長能咬菜羹天下無此色

七言長句

洪武甲寅冬十二月祀岳王仁和知縣四明陳子  
善先生夜宿祠下有作因次其韻

我行古劒關前路正見岳王墳上樹墳前湖水日夜東  
萬古不流忠烈去汴梁城裏邊塵飛炎精一蔽天無輝

宮牆烟柳自春色畫梁燕子將誰依新愁又到西湖柳  
萬縷黃金拂人首長條折取贈行人誰酌英雄一杯酒  
四弦彈出陌上花推手為琵琶却手琵琶坡仙有語誰解道  
獨歌緩緩妾還家往古來今無限思欲著春風恐無地  
杜鵑祇解管興亡蝴蝶何曾知寤寐可憐凍雀紇干山  
致身不似良嶽間翠華已見去冉冉瓊珮無復來珊珊  
西湖信美人間少彷彿十洲與三島獨有荒墳老樹身  
拱把如今成合抱白雲只在山之巔隨風忽墮詩人前

酒酣載歌白雲曲萬事知心惟有天  
宋家秦檜過元載  
奴計專和前志改豈無祖逖空渡江  
亦有魯連終蹈海  
嗚呼自壞萬里城誰挽天河重洗兵  
朱仙靈旗一朝返  
中原此恨何時平昔聞哲王用人傑  
鼇極何曾有崩裂  
天之所壞不可支劒鋒竟染長弘血  
背嵬將軍萬夫雄  
丈八蛇矛成武功左傳一篇長在手  
正欲運籌帷幄中  
干戈紛攘期盡掃敵騎前徒萬戈倒  
咄哉和議竟盈廷  
此理無由問蒼昊子復生孫孫有子  
移山不信愚公死

英靈氣在天地間每到祠前即興起陞堂再拜有所思  
中興奸相真小兒良弓遽藏高鳥在萬古千秋傷有為  
皇綱詎可成烏有誰念青衣類黔首堂堂廟貌民具瞻  
公論由來在身後竭來弔古心自疑浩歌似有山靈知  
蒼茫雷電動神馬恍惚風雲生大旗秋復春芳春復夏  
四時拜掃祠堂下也知天定能勝人列土分茅號王者  
丈夫生死有重輕死非其地如無生吁嗟吁嗟岳少保  
自公之死國不寧二帝只在黃龍城眼枯天地終無情

何如父子麒麟塚離亂之餘除垂拱不教斤斧犯松楸  
肯使牛羊上丘壟詩人夜宿聽山泉出戶滿目皆荒烟  
不聞金鼓殷地發但見玉鏡當空懸忠臣之志何烈烈  
報國惟公心似鐵明年鹵簿迓為神湖上花朝春二月  
景獻太子墨竹

古來畫竹誰最豪蕭悅不及王維高文同之後到景獻  
學得南唐金錯刀齊紈新裂裁成扇頃刻春雷穿鐵硯  
圖成標以裊翠名宛似黃陵廟前見九疑峯高雲氣迷

天寒日暮娥英啼手中瑤瑟不敢鼓恐有鳳凰來上樓  
宣和年間好時節徽廟丹青更奇絕南渡王孫愛墨君  
猶是東都舊枝葉二百年來迹已陳煙梢露葉長清新  
有熊垂衣今復覩制簫未必無伶倫詩人尚友須千古  
冥搜心內良工苦安得此圖掛北牕坐聽秋聲起風雨

布穀篇

陽春布德鷹化鳩眼雖可識心和柔野人因見拂其羽  
有事南畝并西疇桑林陰陰桑甚熟彷彿禽言如布穀

秋成準擬去輸官農務當勤何待促周家開國本務農  
艱難王業存幽風倉庚鳴鵲俱在詠布穀應候將無同  
田家望雨由清晡况聞處處催春種黍稷今年如滿家  
布穀之祥勝靈鳳

贈朱仲誼之京師就其子啟文養

河橋柳青不忍折臨岐頓覺中腸熱百年幾見一代人  
二月重為千里別我居北郭遭亂離韋編大義猶日披  
有頎而長過我者不通姓名知為誰借我大義汗漫讀

因注首肯疑心服擲還上馬竟南征高舉飄飄類鴻鵠  
明年我中己亥科思之不見將奈何每從儒者談彷彿  
恐有仙客來經過昨者相逢知姓字云是崆峒鄒道士  
注得參同只自看仍以葩經造餘子棘闌校卷又相逢  
風簾官燭搖秋紅詩成不許衆吏寫八分作字何其工  
從此文游成莫逆學不能同頗能識作文狀我衰陋容  
三誦真如見顏色今春又作鳳臺行佳兒彩服遙相迎  
西子湖頭一杯酒三疊陽關歌渭城渭城自遠臺城近



碧草綠波空掩映行行無限好江山物色分留待吟咏  
江東日暮多白雲見雲未必如見君雲間若有雙飛鶴  
為我銜來天上文

趙大年蘆鴈圖

平林帶烟波渺渺風低葭莢秋聲小望中疑是彭蠡湖  
十百為羣盡陽鳥楚天未雪無雨霜南來豈必謀稻粱  
哀音若訴雲路迥老翅不厭關河長汀洲水落成平陸  
散亂鳬鷺聚沙曲低飛不肯伴寒鴉猶繞荒村破茅屋

屋中有客揮五絃從之不得心茫然何人圖畫能著此  
趙氏丹青稱大年徽廟元年頒鳳歷此圖正是當時迹  
便從宣和到靖康良嶽禽聲起秋夕古往今來幾盛衰  
摩挲老眼竟成悲良工心苦人莫識似寫周宣鴻鴈詩

悼滄蟾

滄溟接雲水皆立龜鼉鼉蟾蜍泣珊瑚聲碎海若愁  
犀角香消桂娥浥蟾為影兮滄為形都將皎潔同清冷  
九霄倒下湛虛白萬古直上涵空青逝邪虧邪復何有

不抵生前一杯酒海枯月沒雙眼明始識人間亡是叟

畫山水

遙山倚天翠蛾掃縮地成丸怪天小方諸藥幻繭楮香  
咫尺烟雲生縹緲依巖縛屋若不齊人家高下清溪西  
野橋終日纔度馬村店傍午俄聞雞昔年曾過馮公嶺  
樹木蕭森葛衣冷目中覽盡千萬山始覺此身凌絕頂  
郵亭夜宿天未明僕夫憚遠催早行滿前好句吟不得  
今見此圖同此情南宋院人專畫局宮中每進更籌軸

偶蒙一笑便承恩肯信封疆日將促江山萬里開畫圖  
妙絕更有元暉無會須收拾入指掌擲杖跳入壺公壺

畫馬為顧彥明賦

老驥伏櫪志千里烈士壯心同不已因思飲水向天山  
枕上邊聲夢中起昨者試浴江之干蹴踏細浪成狂瀾  
青絲絡頭繫垂柳雲濕五花猶未乾朱衣奚官在垆野  
不獨愛馬尤知馬一顧冀北無留良祗使世間觀畫者  
畫師今古孰後先曹韓古有今龍眠近時亦有任水監

不及吳興為自然吳興父子真遊戲皮氏丹青亦同嗜  
曾貌前朝十二閑落筆頗得吳興意摩挲樹者重入圖  
韓公所記今則無歌行屈指能幾數謫仙少陵并大蘇  
虎頭好古寧論價神駿端令萬人訝他年按圖倘得之  
擬獻君王赤墀下

包山翫月次瞿宗吉韻

昔我曲江觀怒濤越山不及吳山高如何古有任公  
子一釣乃能連六鼃我今杖藜尋翠麓地有白雲人

不俗丹房火冷碧牕虛夜半秋聲撼林木踏歌連臂  
下仙壇目斷西山吳彩鸞桂花飛簾作香雪轉首便  
覺秋闌珊人生歡樂難再得始信光陰如過客陶令  
空披漉酒巾謝公謾著登山屐菴前堵牆如白虹洞  
門不掩來江風分師半席師已許經筵蠟燭搖秋紅  
郊何為寒島何瘦新雨能來寧論舊今宵爛漫得好  
晴知是何人補天漏少壯而老理則常胡能不死凋  
三光放麋西巴誠不忍歌鳳接輿無乃狂茲遊可繼

五君詠祀事同陪匪乘興中庭坐待明月來樹影團  
團一時並

關山雪霽圖

前峯後峯雪模糊東村西村春有無快雪時晴入佳想  
况復見此關山圖關山迢遞相聯屬玉潔珠光眩人目  
扶桑飛上金畢逋暗水流澌度空谷野橋行過路三义  
青旗插簷沽酒家驅驢倦客得少憇悵望遠道還咨嗟  
詩翁好事常起早天寒只恐梅花老柴門時有故人來

階下白雲須用掃此圖一日落塵寰筆法依稀荆與關  
人生遠遊固云樂何似在家長看山我本識字耕夫耳  
占祥便作豐年喜田園歸隱會有時麥飯飽餐茅屋底

郁魯珍畫

平生山水嘗見之不意畫圖如此奇松雪老仙得其理  
筆端幻出無聲詩森森千丈長松下中有高人韻瀟灑  
揮絃豈為送飛鴻情性因之自陶寫杏壇絕響幾秋春  
誰信經成能致麟黎陽先生真隱者為假山水傳其神



溪山蒼蒼溪水綠君胡為兮在空谷  
他時倘鼓宓賤琴  
更效南風歌一曲

畫梅

玉龍寒嘶銀粟下山色昏冥如破瓦  
老枝枯枿無眩容  
暗裏陽春生一罇東風團雪作好花  
明月落在詩人家  
遠移何必得健步  
禿兔敗繭能榮華  
花光補之俱寂寞  
王冕後來觀此作  
歲寒重約到孤山  
共倚巢居舊時閣  
牧童畫

田家養牛緣種穀童不解耕還解牧日暮麾之匍匐歸  
猶向籠中顧鵲鵲西風入樹秋有聲千村萬落皆收成  
截來短笛吹未得拍手時時歌太平太平氣象難摹寫  
依稀似在桃林野披圖見此黑牡丹始信戴嵩善畫者

吳山對雪詩

并序

庚申歲未除廿日以公事早過希孟家宗吉繼  
至小飲遽出時雪深尺餘遂由吳山官舍後循  
松徑而上至烏龍潭過卜執中家欸以酒果憑

高下視則西湖諸山歷歷在目城市列屋鱗鱗  
相比公侯之第佛老之居金碧瓊瑤遠近輝映  
雖世所謂水晶宮銀色界殆似之矣時雪未止  
景色蒼莽欲求名筆登之繪事惜無其人遂悵  
然與三友別越二日宗吉以詩來則又兼紀其  
後一日事蓋彝訓堂前二松乃南宋物也姚子  
昭領薦時甘露降其上五桂則予目覩陸德陽  
所植將四十餘年矣今宗吉乃能愛護之豈不

重有感於吾懷昔袁安以僵卧為高王猷以乘興為逸矯情者固善於自處忘情者非善於處友且吾二三人無私者高達者逸而知公事之當勤友道之當重因吳山之清遊繼虎林之勝事天倫之樂無過於此歲月易流會合難再因宗吉有作從而和之以為他日之佳話云

臘前有雪宜三白笑倒田翁手齊拍去年天氣不多寒盈寸猶難況盈尺嗟予亦是田舍翁敢以玉山高兩峯

二賢珠玉在我側綠髮青瞳顴頰紅久交共喜情懷盡  
意行不覺吳山近松間小徑縱縈迂竹杖芒鞋須一進  
山前相府何潭潭山中道院鄰禪菴興來偶到故人宅  
出果行酒方交談歲如何分歲云暮白首重來記前度  
湖山倒浸水晶簾玉樹瓊林歸指顧山陽先生坐高堂  
挺然特立逾脩篁誰憐衰翁方避俗寒牕癡坐如蠅僵  
失喜一時觀二妙剡曲回舟豈同調明朝呵筆和新詩  
簷有梅花須索笑

美人折花圖

深宮細雨流光濕，薔薇吐花紅欲摘。  
美人梳洗出簾遲，雲擁髻鬟高一尺。  
愛花呼婢折來看，一枝凝薦黃金盤。  
却嫌綠刺暗傷人，整頓玉纖看黛攢。  
笑語追隨真有意，繡羅衣裳照珠翠。  
長安水畔若相逢，不是杜陵心亦醉。  
昭陽燕子尾，氾氾皴裙無計留。  
飛仙春風人面解，傳得始信丹青非偶然。

二美人圖

黃金買妾身何曾買妾心  
妾身豈願死義重千黃金  
主家珊瑚高比樹如意聲中落  
紅雨墮樓化作蘭麝塵不  
復樽前為君舞按圖哀怨豈  
綠珠晉家事業真剝膚  
金屋豈無人三千當一身如何把  
玉笛吹動漁陽塵  
梨園歌舞成消歇  
海棠飛作胭脂濕  
空遺羅襪不生塵  
香冷馬嵬坡下月  
按圖哀怨豈玉環  
唐家事業真厚顏

畫梅集杜句

東閣官梅動詩興

和裴迪登蜀州東亭送客逢早梅相憶見寄

多才依舊能

潦倒

戲贈秦少府短歌

絕筆長風起纖末

戲贈韋僊雙松園歌

亂插繁花

向晴昊

蘇端薛復筵簡薛華醉歌

却意年年人醉時

樂遊園歌

千朵萬朵

壓枝低

江畔獨步尋花七絕句

不知明月為誰好

秋風二首

武陵春樹

他人迷

寄從孫崇簡

中夜起坐萬感集

乾元中寓居同谷縣作歌七首

山鬼

啾啾雪霜逼

虎牙行

歲暮窮陰耿未已

歲暮期王將軍不至

臨風三

嗅馨香泣

秋雨嘆

### 送謝鐵崖遊龍虎山

有美人兮懷遠遊逍遙九州復九州暫來淮楚與吳越



五雲飛上千金裘八公山在淝水上草木尚若森戈矛  
澄江如練誰解道况聞好鳥喧春洲東山薔薇幾回落  
昔人何處青苔稠錢唐故宮盡禾黍帝子一去江空流  
客兒亭前高興發便欲著屐窮深幽天雞三鳴更五點  
海日湧出黃金虬瑤笙聲斷白鶴遠知有子晉從浮丘  
蟠桃開花今已實似許方朔重來偷如何去作龍虎客  
遠慕漢代張留侯我聞仙翁號虛靖草菴宛在山之隈  
長乘丹光翳彩鳳或有紫氣隨青牛子能候之問至道

黃庭內景非難求四方上下遊已遍歸來十二仙人樓  
樓中長嘯弄明月握手一笑三千秋

次張行中見寄韻

并序

予取友衆矣毀譽相半晚交行中則道義之士  
也一日獲覩其師吳觀光相州集則知行中之  
學有自來遂以鄙見具序壺父後行中復以古  
體謝附晚望近體一首因併和之以發其意焉  
巧言如簧自口出含沙射影過於蜮不思黃鳥嚶其鳴

反效青蠅白者黑自非盤根別利器真以委形同槁木  
偶然得集類武陵率爾成章道長吉策足便可登要津  
高舉惟須振六翮文從字順乃立言意會神交豈容默  
躍冶每怪不祥金剖璞始憐三獻玉寂寥頗若太音希  
渾厚真如元氣毓追逐還能到李杜壓倒何須論元白  
悅理自信猶悅芻好德誰能如好色六義端因詩序知  
千慮却從愚者得會當載酒過子雲況有侯芭作立足

陳居中進馬圖

明王慎德蠻荒賓尺天寸地皆王臣遠人重譯貢龍馬  
流沙萬里來麒麟金風聲動佛郎國寶劍氣接明河津  
不知何年離榆塞但見此日朝楓宸毛騮生來玉琢鼻  
錢驄隱起花攢鱗最後赭白信無敵如此丹青疑有神  
騰驤欲飛使者喜控制不得奚奴嗔我聞陳閎善匠意  
無乃韓幹為前身按之圖中得所似惜哉世上遺其真  
驪黃牝牡不易索九方臯後知何人

月軒為海昌張侯賦

軒前月來人不知月來豈與人相期張侯心中有明月  
一舉目間恒在茲昔年見月親具在今年見月親何之  
玄霜徒勞玉兔搗桂樹搖落秋風枝海昌之地亘百里  
斯民父母非侯誰民之望侯如望月高懸一鑑分妍媸  
公餘燕坐此軒下中夜矯首空馳思瓊樓玉宇在天上  
安得醉入黃金卮霓裳不及彩衣舞憑軒謾憶趨庭時  
天王天下民父母光華旦旦無盈虧海隅蒼生罔不被  
依光已為賢侯期一軒雖小關孝治此理亦自良心推

永錫爾類思不匱謂予不信徵諸詩

鬼獵圖

終南進士乃好武野魅山精皆部伍蒐田也欲從四時  
作氣恍如聆一鼓銅鉦先鳴地欲裂阜蓋後張風為舉  
蹇驢足跛不受鞭良犬尾搖何用組錦條未許縱蒼鷹  
鐵絙猶能縛玄虎跳踉衆鬼為卒徒矍鑠一翁作謀主  
或為狼顧背拔鎗或作猱升前試斧鳴鳴口應已張弓  
蛇偃肩擔來殼弩身憑大盾宛轉遮手弄飛槌高下舞

坐作擊刺衆莫當進退超驤孰敢侮猙獰似覺口吐牙  
輕捷渾疑臂生羽逐禽不假御車與獲獸何勞施網罟  
亦如塵世有司存頗類神仙足官府畫工後輩效前人  
戲筆何年追舊譜已無吳生名擅場復有顏輝好奇古  
周易取象車載一韓子送窮名數五如斯情狀不易知  
更欲形容亦良苦且須留取作歲除爆竹一聲春滿宇

鍾馗畫

北風吹沙目欲眯宮柳搖黃拂溪水終南進士倨然起


蛸磔于思含缺齒袍藍帶角形甚傀烏帽裹頭靴露指  
白澤在傍口且哆馴擾不異麟之趾手持上帝書滿紙  
若曰新歲錫爾祉一聲竹爆物盡靡明日春光萬餘里

望雲圖

上山看雲雲在天下山看雲雲在山朝行已與雲俱出  
暮歸復與雲俱還在山之雲不可執在天之雲不可攀  
白衣蒼狗須臾變化豈有定乃在孝子方寸之中間劉  
郎有親舍杉關關上白雲長自閒驅馳王事歸養不可



得豈畏七閩尚去行路之多艱竭來西湖弄潺湲春風好鳥  
鳴啗啗思親不見出涕潛衣裳在笥空斑斕他年彩詒  
或可須纍纍印綰青絲綸君恩一日如賜環刻木肖像  
雙親顏并州參軍若是班此圖此意百千萬載留人寰  
吾詩夸矣人其刪



柘軒集卷三

欽定四庫全書

集部  
柘軒集卷  
五四

詳校官太僕寺少卿臣李廷欽

中書臣劉源溥覆勘

總校官進士臣朱 鈐

校對官中書臣牛稔文

謄錄監生臣朱 昇

欽定四庫全書

柘軒集卷四

雜文

翰墨清事序

明 凌雲翰 撰

避俗翁無所事事恒以翰墨自娛戊午夏至望前三日  
夢至一所其地爽而塏其堂高而敞其室廣而深有圖  
有書有琴有瑟凡古今名人書畫無不在而無聞者通

乃逕造焉見二人衣冠甚古危坐雄辨因竊聽之一人曰吾翰林主人也一人曰吾子墨客卿也今夕何夕得休於事客曰敢聞主人所事乎主人曰吾處翰林主中書凡公家事雖甚煩以有益於發號施令簿書期會也故盡心焉逮夫書趁姿媚畫匠經營賦三都於十年發百篇於斗酒事則清高勞亦甚矣可聞客所事乎卿曰吾處子墨久從子遊在公家則同事其在文藝則均勞義獻芝靖匪吾二人左右孰有身後之名哉彼十日一

水五日一石謂留其跡者徒勞人耳余聞語怪趨而見之若素識者乃延余中坐質昔所言余應之曰皆是也抑有說焉夫人之所以為君子者貴器之藏而動以時斯不器矣余知二君子不器久矣龜龍圖書自汝宣之蚪蚪文字自汝傳之書契非汝其明莫決筆端非汝其辭必滅竹帛之名案牘之程非汝是著何有乎汗青其喪汝精勞汝形亦神汝靈若夫一張一弛文武之道藝之是游算之數也書法有六心之畫也服章十二身之

飾也其翰墨之源乎列女有傳後人圖之名臣有畧後人像之其翰墨之流乎玩物喪志古人不與玩物適情亦古人所許也語未既或有進者曰好時即墨二侯願見於他室顧候二人莞爾而笑曰吾四人皆客之用也何避嫌乎余聞而驚寤遂篝燈而筆之詰朝有碧牕叟偕抱朴生持卷以詣題曰翰墨清事將求名士大夫善書與畫者各效其藝以為珍玩韋序其端適徵於夢遂告以是生即葛景芳叟即省元俞友仁翁即鄉貢進士

凌雲翰也

柟軒詩序

柟軒孰為之名吾友葉賁氏先公石林所名也公顯於  
宋寓居吳興弁山時慕杜少陵詩植柟石林七世孫曰  
仲芳洎其子賁猶及見之仲芳後居錢唐語賁以故求  
柟植軒之隅歲久漸有冥冥之色先是里人林靜氏亦  
與仲芳友因所見聞為圖并記以遺後賁為國學上舍  
仲芳始以圖記示俾序諸公歌詠意蓋欲因先世之手



澤繫後人之心思忠厚之意非言辭之可殫因請之數  
乃強為之說曰嗚呼柟之歌詠則難胡為乎難哉有少  
陵詩為之前斯誠難矣軒之歌詠則易胡為乎易哉有  
仲芳嗣為之後斯誠易矣莫為之前則芳亭何以制莫  
為之後則柟軒何以作若夫八葉比世三槐徵德猶有  
富貴望若惟桑與梓寓其思慕之誠恭敬之實哉石林  
公之澤於斯在矣矧公之在內則有安危利害邪正休  
戚之論與夫朋黨之對在外則有願昌救荒之政作為

文章清新華麗而名聲為明時重者考之史冊炳如也  
今黃之文學固效於先世事業則無愧於前人喬木之  
望不足論甘棠之思為有在人之愛公者亦猶子孫之  
愛親也子孫有能如親者豈不又為後人之所愛乎仲  
芳已老黃則方進而未已故重勉之審如是則枻軒之  
名有其實矣黃嘗從學於余知為學之方故遂言之為  
仲芳復推廣知本之論云

朱氏族譜序

嗚呼天開太極吾夫子以庚戌而生於東周之末太極  
後開朱夫子以庚戌而生於南宋之末聖賢之生異世  
同符吾夫子之澤萬世不斬朱夫子之澤豈五世而斬  
哉余於朱公昌宗家乘見之矣公字彥明號頤齋總角  
時嘗聞父曰仲仁者出自考亭嘗治書經傳大父昇甫  
在宋嘗守廬州府舒城縣蒙有土田之錫咸淳年間教  
諭建康府宋社既屋年益耆艾不樂於仕遂教於鄉弟  
子從之者衆歿而人以鄉先生祀之延祐間御史交薦

教諭縣學弗就因自建康徙居虎林遂占其籍昌以家庭之學僅以私淑朝廷始設鄉校因忝為師自昌大父以上失譜無徵雖大父與父僅記其字若名則以五行之生為序大父以上皆不可考又恐所聞者併至失墜思得當世能文之士述其槩焉以余業文故請序余以聖賢之生有數而子孫能世家亦有數朱夫子之子孫衆多則皆在南若昌之大父與父其一也且以朱夫子之子孫在考亭者其源也在武夷者其流也在建康在

虎林又其流之與支也矧在天下者乎天下有孔氏則皆孔氏之子孫有朱氏則皆朱氏之子孫此聖賢之澤不可與君子小人之澤例論而孟氏得私淑者亦幸其澤之未斬其意匪懼乎澤之斬懼乎道之不傳也今昌也私淑孔子之道則亦聖人之徒能私淑朱子之道斯不愧於賢者之裔矣自是以後子孫有能嗣之者在錢唐當以是為譜尚當合他譜以正昭穆之離合則二夫子之澤與天地同其久奚以世論哉是為序

和梅詩序

余幼時聞先輩言海粟馮子振作文最爲汗漫一日袖詠梅長句凡百首謁中峯本公尋和之馮大驚異及詳觀二作則知馮以正勝本以奇勝皆非末學所能至也吳興林子山者亦嘗和則奇正迭出要不在二作下欲追和未暇也一日友生王子中氏盡和前作裝潢成卷出示余愛其清新和雅在子山伯仲間是亦以正勝者子中俾題其端余曰古今賦梅者衆矣誠齋亦嘗論之

一聯數句不害為少連篇累牘不害為多亦猶花之疎  
莫人鄙繁莫人厭也今子中之作以稍牽於韻然能使  
人不以繁厭則無愧於此花矣子中方務於詩學駁駁  
乎作者之域姑以所言題其端他日拉子山氏同一正  
之則盡善矣

送沈新民還太學序

聖朝建學育才將見於用故說本以為贈天地之生材  
不為不多且美矣惟木之為材與人為近植之以土地

養之以歲月澤之以雨露堅之以風霜自萌蘖而根株  
自拱把而合抱拔於地而上干青霄何哉培養之盡道  
也國家之育材其猶天地乎上而成均下而府州縣社  
皆有學亦猶土地之植也里社之學必取於民府州縣  
學必選其俊秀成均則又拔其才藝之尤者與焉亦猶  
歲月之養也府州縣裁之成均培之必自拱把可待其  
合抱況合抱者久可待其干青霄乎吾友沈新民氏從  
予學易府學弟子員與鄉貢進士選在四十人中居二



二十七人上既上於朝廷其年未冠制許培養成均未  
幾丁父憂侍母氏疾有兄備養以餘力為文今服闋將  
還不忍去膝下母勉之乃行告別於予予知其為合抱  
之木而干青霄也但欲堅節於風霜保操於歲寒之後  
他日棟梁大廈而柱明堂者庸非徂徠之松新甫之栢  
乎噫牛山之美以為良心故國喬木以為世臣執以喻  
道伐以喻交此特以各取喻而已古人以種木喻德昔  
新民之父以尚德名堂則樂道好善亦猶三槐為德之

符其實可驗於人矣予以樗散之材不甘匠石之棄因  
新民之行故說本以序別庶附張琥稼說之末云

送金元哲之官分水序

聖朝之設科也本德行而兼六藝黜詞賦而崇禮樂蓋  
有合於成周三物教民賓興之意若明經對策則又斟酌  
漢唐之制而加詳焉是欲底於實效非徒事乎虛文  
而已一時之士咸喻上意莫不鼓舞奔走以圖報稱洪  
武辛亥鄉闈歲開吾郡與計偕者凡五人焉元哲其一

也元哲姓金氏名師古世錢唐人與同郡何希道李大  
有何子祥俱以春秋薦其一人以詩薦者則張克敬也  
吾郡春秋之學自應劉二先生後不四三人今歲乃連  
得四人焉是則郡同經同而薦又同者未若斯舉之為  
盛也聖朝幅員之廣亟於用人不待上之春官悉授以  
職元哲拜嚴州府分水知縣命將之官道過錢唐省親  
于庭訪友于里人咸以為榮也於是學校之士賦詩以  
贈俾序其端予惟儒者之用為世之幸其故何也以其

有致君澤民之心而又知所當務苟徒守章句而不知  
變通則迂儒之誚有弗能辭者且分水之地去錢唐不  
三百里民淳事簡足以為治而釣臺在焉子陵之高風  
與山水同永廉頑立懦可以勵乎薄俗元哲之為理必  
知所先者矣於其行也姑以規焉

送維揚顧伯琛序

維揚顧伯琛為臨安訓導也將行請贈以言為朝夕勗  
蓋其父昔以判府為友予不敢靳也夫臨安據山川之

欽定四庫全書

程朝集  
卷四

九

勝故有學宮聖世師古學兼大小經史六藝咸隸焉蓋  
駸駸乎成周之制漢唐以下不數也今學官之設權輿  
於趙元晦作興於高孟昇二先生元晦先以春秋孟升  
以書元晦歿孟升繼之教養既成聲譽以著皆曰賢令  
尹知人故教官皆得人也所延訓導皆朴茂之士身之  
所行足以為教口之所誦足以為學亦曰二先生知人  
故師儒皆得人也昔與何彥恭先生在郡學時當聖朝  
歲開科舉之再同備員簾內外元晦與焉元晦乃予與

彥恭友孟升則與彥恭友伯琛則予友彥恭與伯琛同  
師於徐先生孟升則師於何先生伯琛嘗從予卒業則  
予之視伯琛亦何先生之視孟升孟升既能知伯琛而  
舉之予又安得不樂道之乎其為人也學篤而禮恭言  
溫而氣煦孝弟忠信行而有實經史六藝習而有文今  
則移其所受教者教于人推其所為學者為所學則庶  
幾師道之立善人以多信矣於是知伯琛將以華其行  
者六人焉因以齒各占一韻并所題各以五言古詩賦

之因以師道立善人多六字為韻限以六韻會稽王好  
問先生則與予同年維揚朱仲誼先生則與伯琛同郡  
錢唐何彥恭先生俞文輔楊復初王士中先生則皆予  
同里同經復初則亦與元晦同經皆有師道者也士中  
又善書得晉人法俾牽連書之為伯琛知勉焉

送指揮胡公還平陽序

代作

括蒼胡公之衛平陽也軍肅境寧而民有賴時今參知  
政事徐公適知府事承宣之寄庶有資焉矧其土地廣

行人民淳朴風俗崇禮讓重信義教令之行遵守惟謹  
故亦為易理焉乃徐公領戶曹相去日遠而平陽山水  
之勝往來心目之間而弗得見也矧與胡公之遇哉洪  
武五年春胡公以奉襄大事歸於鄉里事竣將還平陽  
道經浙江得與徐公叙疇昔詢其民則板籍日增風俗  
日厚雖王化所及四海皆然而平陽之民尤感化之速  
也因民之厚知公之賢思其民而不得見也見公如見  
其民焉今以母夫人之未葬不憚數千里之遠克終人



子之事及其還也其民必曰上之人孝其親忠其事也如此吾儕小人可不知所事哉則所以興起其忠孝之心者未必不由于此傳曰孝慈則忠又曰上老老而民興孝公之還也尚為斯民道之

贈世醫潘懋華序

諺有之醫不三世不服其藥謂必世于醫者然後用藥審治疾當也吾鄉醫者甚衆求能世濟其美若潘懋華者幾何人哉懋華以誠篤之資究岐黃之術開中和堂

于青門之西恒以濟人為心故凡疲瘥殘疾顛連無告者咸趨焉因詢其先世則名醫悅可之孫仲寧之子也予雖不識悅可而知仲寧之學有自仲寧有子能世其業則仲寧之學不泯矣今年春予親友劉思禮感寒疾治罔效求懋華治之遂愈蓋懋華之法本諸長沙而參以家學之奧焉故病劇而無變壞之失病瘥而無留復之患思禮將報其德而徵文於予弗獲讓因告之曰夫傷寒之為病其法則長沙之論盡之矣叔和之編述無

已之註釋蓋足以羽翼之若龐安常之卒病論朱肱之  
活人書韓祗和之徵旨王實之證治雖間有得然不若  
金源劉守真張子和之法足以盡軒岐之蘊至若潔古  
雲岐東垣好古亦可謂有功於世道者矣噫守真雖有  
門人而無子孫世其家潔古有子世其家而無孫繼其  
後今潘氏之門由悅可而仲寧由仲寧而懋華可謂世  
其醫者矣況能以劉張之學發長沙之妙予見南方以  
醫名者不必他求也故因思禮之請特為之書俾疾者

知所趨云

贈世醫王敬叔序

甚矣醫之為難也道寓於素難之書法肇於傷寒之論  
人知其論傷寒也不知其兼傷風而論之寒之傷人也  
深風之傷人也疾要皆六氣淫勝也且諸風掉眩屬之肝  
諸濕腫滿屬之脾肝急而緩以甘脾濕而燥以苦平其  
所勝達其所鬱補其所不足瀉其所有餘如斯已矣庸  
于醫者虛實罔知損益罔措謂風為寒投劑以熱謂濕

為熱投劑以寒懣血為榮氣為衛之理昧濕同寒火同燥之機乃至剛劑妄投復方悞用毫釐弗察危殆輒成彼何人斯一至於此杭人王仲德吾友王士貞之父也淫感風濕注於足少陰太陽之證醫者乃孟浪而治之藥屢投而證屢變甚至淫及四支痛周一身有類剛症者焉匪病之病乃藥之病也舉家驚視罔措手足適嚴陵王敬叔先生以公家醫事至蓋仲德素交來訪知狀曰苟可治吾盡心耳及診則脉九菽為益三菽之重其

候有異曰是必風濕淫勝前醫頗失之今痛未已必針  
人中與承漿燭肩井與曲池其病可已如言果然又為  
治湯液醪醴其病大已仲德思所報敬叔曰吾與汝同  
氏且友雖殊其方安知不為兄弟之親乎彼仁民愛物  
亦由是而推耳何以報為苟得業文之士書其得失庶  
為學者勸則為報多矣仲德乃遣其長子士原介吾友  
貢士沈新民國子監生楊得中以文請二友與士貞為  
同舍蓋義為也吾得已於言哉雖然越人之傳由子長

而明戴人之學由知幾而為繼越人者錢仲陽能明仲  
景之旨而劉貢父傳之戴人者李明之能明仲陽之旨  
而元好問傳之今敬叔有前人之學而無文以張大之  
良可愧也姑述其說可以備他日太史氏之所錄是亦  
為仲德之報也

贈卜師李通玄序

夫龜之為卜所以使人信時日敬鬼神畏法令也自太  
卜之法不傳所謂三兆六龜與夫經體百有二十頌千

有二百皆不可得而知其可知者亦惟理之在人心者而已易大傳與筮並稱故曰以卜筮者尚其占是即書所謂龜從筮從之義求之周禮掌卜筮者六官凡占大事先之以筮而後決之以卜是亦從長之說也然太卜之書雖不傳而間見於史遷之書則猶有可考後世有專門名家者亦能默契乎先聖之心不戾乎太卜之旨狐疑以之而決猶豫以之而定豈不謂之名士也哉杭之青門有業是術者李其姓通玄其號焉其為人也溫



乎其容肅乎其躬其色也和其氣也充志定而理明學  
邃而業工是為卜者之雄人有大疑就而決之必炳蕭  
振龜按甲丙之位察手足之狀稽經為之斷焉人有不  
卜卜無不驗自非有得於探賾索隱鉤深致遠之學其  
孰能是其號通玄也宜矣古人之卜習則行之不習則  
修德而改卜今之為卜者間有不習則俛俛無所主僥  
倖以濟其私併使古人命龜之意淫於術數之末而自  
警之意荒矣惟通玄則不用三兆之法辨六龜之理因

人趨避而以義命之大者告之是亦鄭詹尹嚴君平之流亞也故樂為之書

贈龍翔宮道士毛起宗序

實理之在天地間萬古一日也在人心萬古一息也風霆之流行雨暘之應候必得是理之實而後屈伸變化無窮焉故人之所以位天地育萬物亦因吾心之實而致耳自元教之立智者遂倣禮為之制按法為之科金書玉簡擬章表也朱書丹篆准律令也琅函積于簿書

寶錄多于案牘禮則君臣事則官府終非篤信之士則弗克遵行之錢唐高士毛君起宗生有純質勤學好問在總角人已譽之長慕玄教乃棄俗以從授龍虎之秘錄傳正一之奧旨鞭驚笞鳳檄龍命鴉輒有奇驗及居龍翔之宮則名以誠著行以道成凡有事于上帝必與監齋之選蓋玄門之有監齋猶朝廷之有執法匪德望聞于時文學推于衆者于厥職為忝至正甲辰夏六月大暑雨久弗止民多怨咨右轄海陵潘公聞而憂之謂

山林之中有道之士其誠可以回造化而役鬼神於是  
發帑致醮禱于吳山三茅觀真人陳君伯達主行其事  
監齋之選首禮于君承命惟謹未事則嚴齋戒慎居處  
既事則有虔其容有恪其矩儼乎其若臨愀乎其若覩  
肅乎其若有聞焉尤且謹廉察之職申褒貶之章言皆  
子史文悉駢儷公於時評敏於宿構有事於是者望之  
如神明畏之如師保周折其旋規矩適中威儀隸隸綽  
有可觀竣事之日凡三達曙已而陰雲解駁祥飈欬興

曜靈之駕已出暘谷而拂扶桑矣人咸謂右轄之誠足以動天陳君之誠足以感人而君之誠有以應右轄之命當陳君之舉者陳君嘉其相事有成徵文以為華因語之曰世之有功於文事武備者則詞臣戰士必榮其褒賞君子有修己之實則鄉里咸得以榮之矧服玄教之服誦玄教之言行玄教之行而克為國家捍禦災患者乎則其一念之誠有非聲音笑貌為者此陳君之所以必致其報也歟予于玄教之事未詳其旨特重其有

功於民故撫實而書之以致陳君之意云

聽松軒記

無錫浦源氏居九龍山中開軒松下聞有聲自松出冷然可聽因顏其軒曰聽松鄱陽玉雪翁聞而扁以篆同里張孝廉見而記以文固在也丁未歲軒燬于兵辛亥歲復葺之壬子歲春三月源訪親錢唐因從弟澄知予業文請續為記再讓弗獲因語之曰天下之聲衆矣奚獨聽于松哉松可聽則凡觸吾耳者皆可聽也雖然聽

於天者以理不以聲聽於地者以道不以形聽於人者以德不以名夫有非生于有而生于無無非滅于無而滅于有方其松之屹立于軒楹之外也曷為之聲至於天風忽來飄蕭披拂徘徊留連久而不去也然後至音發焉前如倡後如和韻如笙竽鏗如金石洶湧如八月濤斯須風止籟息寂無所聞則向之所謂聲者果有乎果無乎予嘗泛觀乎萬物矣有形者有形形者有色者有色色者蓋聲有息而所以聲者無息源之聽於松也

毋聽以耳而聽以目毋聽以目而聽以心耳司聽非目  
不知其為松目司視非心無以知松之可聽古人有聞  
歌而通者聆聲而省者審音而知政者今源也因事物  
之微而悟寂感之理以是進學其可量哉若夫山林之  
佳軒牕之美圖書文史之富前人有能記之者故特記  
其名軒之意云

志隱齋記

古之人出處一機窮達一致安於所遇而已方其隱也



乃以隱為志及其顯也則亦以所志而行之彼志之不  
立者惟志於顯而不志於隱隱而求顯不足以言志矣  
吾友顧中道氏嘗以志隱名齋或以為異於隱居求志  
之意殆非然也求志則守其所行志隱則固其所守皆  
此道也且人之處世未嘗不志於隱事親之孝即事君  
之忠事兄之弟即事長之順居家之理即居官之治故  
曰孝弟慈所以事君事長使眾也孰謂出處異機窮達  
異致乎若伊尹之耕莘太公之釣渭孔明之廬南陽皆

志於隱及其顯也莫非自隱致之鹿門德公則終於隱者也終南藏用則隱之不終者也中道之志亦志乎伊尹之志矣伊尹樂堯舜之道亦豈出於孝弟之外乎先儒謂隱居求志惟伊尹太公足以當之又謂顏子亦庶乎此中道誠能學顏子之學則能志伊尹之志矣是則名齋之義非志隱也乃志道也志於道則志於仁中道其勉諸

行素齋記

錢唐為東南都會以醫顯者非一人國朝之初獨以周文傳氏稱謂其嘗學同里蕭厚齋姑蘇葛可久蕭則專南法而皆慎葛則兼北法而益奇得蕭法者間有其人得葛法者則文傳而已文傳舊有齋居而名以行素嘗燕坐是則究俞容軒岐洎秦漢晉唐宋金之學故治人之疾苟有生理無不獲愈人皆德其能有所為而不知其為所當為也文傳嘗以醫道行乎州里矣而州里德之行於親友矣而親友德之由是以名聞於朝廷益廣

其德焉乃亟為親老而歸朝廷以孝治天下故寧失一良醫不忍失一孝子得請方其歸也若有所遇既歸而益殫濟人利物之心有疾惟恐後未始有厭倦多足意視其齋居則以桑梓數畝萱蘭且盈前參苓芝朮裕如也如是行素之名益彰文傳嘗起予疾亦欲為之記弗果里人勞仲禮王仲德徐華甫三人者義人也德文傳甚其友楊達春滯下疾徵文報之予應之曰文傳之活人不知凡幾人之贈言者又不知凡幾望之于家文軸

充乎梁棟徒能美行道之跡未能喻行道之心今齋名未記茲非缺歟且行素非為之也昔舜若將終其身於飯糗茹草若固有於衿衣鼓琴皆行素也孔子飯疏飲水固行素為魯司寇墮三都却萊夷亦行素於陳蔡於宋於匡非行素乎使遂居夷遂浮海非行素乎當是孔子之時惟曾點春服童冠浴沂為近之後世陶淵明亦庶乎此論者猶以點行不掩而志及之學不足而趣有之故世之能行素者亦觀其志趣之何如耳今文傳之

志於醫也學如張機道如朱清用如錢乙法兼劉張方  
會張李而加詳蓋羅謙甫朱彥脩之倫非區區為世之  
所能及也且人而無恒醫不可作醫不三世藥不可嘗  
貴行素也舍道德之富仁義之貴可素而行乎虞孔之  
聖未易希能希曾陶之賢可也曾之言志不過素居之  
位陶之取友則在素心之人文傳可謂能素位三君子  
可謂有素心皆可記也

性齋記

錢唐人有學老氏之學者實南州高士之裔虛一煉師之弟子應誠其名克明其字性齋其號也質厚而氣清言寡而行卓與人交若疎而實密與人語若異而實同每齋居燕坐或至終日悄然若思疑然若愚如觀鼻端之白如索澗中之珠人或詢之則曰吾欲達其性耳又勸其觀書則又曰書以道性性未有定與其觀書寧觀若影與之友者知其識性也咸以性齋稱龍虎冲虛真人為作大篆又錫以冲素宏妙法師之號由是人咸知

性齋之為克明也吳興林子山氏善丹青貌一道士於  
深山大谷之中長松茅屋之下正襟危坐真有定性之  
容一童子具有以知其加定性之功者丹青之妙一至於  
此噫性即理也理無形可以圖圖者圖其意而已且  
性之為義肇於商書暢於洙泗大備於濂溪考亭諸賢  
其說固在自誠明謂之性則子思子發之以為性者之  
事克明欲究其說可不求諸章句乎或者以性齋所居  
之室在清寧道院中山川環拱樹林陰翳乃城市之山



林若然則他日一造其室留以終日當師其景而重為之記云

葛母傳

葛母姓徐名節字貞節金華永康人父同甫母沈氏幼純淑若成人勤於女工母鍾愛之及長兄袒授以女箴內則通其大義年十八適同里葛吉甫氏事後姑惟謹姑弗慈益竭力以盡奉養之道久而姑亦大悔曰吾不知新婦之克孝也夫歿年甫二十有七舅姑欲奪其志

誓死弗許乃綱紀家事如夫存奉舅姑以終撫子女以  
成祭祀不逾於時田廬益增於昔致敬宗族周濟貧窶  
內外咸譽之性淡泊厭所居之卑卜大塘文山築堂其  
下扁貞素以自志二子曰秉仁曰秉義女二人長曰佩  
蚤世次曰孝適同里陳世英亦蚤世孫六人嗚呼夫婦  
人倫之本風化之源三從之義一醮之節亘萬世而不  
可易者也教化不明廉恥道喪為人子者不知所以事  
其親為人弟者不知所以事其兄為人門弟子者不知

所以事其師矧責於婦人女子乎若葛母徐氏者足以為世道重矣天錫高年神相厥裔積德之報胡可量也予嘉其事故述梗槩為當世家以備他日史臣之擇云

吳山隱夫傳

杭有杜彬父氏居吳山因以為號識者咸以吳山隱夫稱之所居又當吳山之勝過者甚衆予偶偕吳以道過其居得見其人焉顏蒼而容冰髮皓而澤目紺而朗膚積而腴其有道之士歟詢之則嘗壯而仕老而隱身以

以青囊之術鳴於時者因詢其學之初曰當宦遊時心  
實慕道後於深林大谷之中遇我冠博帶之士睥睨上  
下若有得者因趨進而揖之士曰吾所學者風水子願  
聞吾與子言夫陰陽之宅勢異而理同天有四時其氣  
如春夏秋冬其德為元亨利貞以陽宅欲顯而隱猶春  
夏之元亨後有秋冬之利貞陰宅欲隱而顯猶秋冬之  
利貞而有春夏之元亨也顯而無隱無以綿其後隱而  
無顯無以蔭於今此其大畧也若其觀天文察地理相

陰陽度流泉則以序此景純以下之書具焉子能道之  
後三十年必以此隱予初以功名為心雖盡受其術而  
弗欲行年如其數仕既退身既老乃以此術為人售始  
一二驗又十百驗今則不知其所驗者幾自以名之顯  
則欲實之隱焉予因異之曰吳山據錢唐之勝非明地  
理之學者能之乎人未有德於人者且責報今既有德  
於人而弗責報非有經術之學者能之乎且地理之學  
在風水言人心固有無形之風水焉有有形之風水焉

有形之風水則可以目觀無形之風水則可以心會必  
有心會之元乃盡目觀之妙彬父蓋其人也彬父身其  
隱名從其顯乎故書為吳山隱夫傳

說習齋說

錢唐楊文卿嘗以說習顏其齋居而請說於予予不能  
解也蓋魯論以習而後說未聞說而後習者夫習而說  
則順言其效之所至說於習則逆推其功之所成此經  
義語也嘗讀易而有得於兌與坎之卦矣兌之象有曰

兌說也。大象則曰：朋友講習。坎之彖有曰：習坎。大象則曰：常德行，習教事。由兌而觀，其說在乎習；由坎而觀，其習則在乎教。習乎教，則以習而言；說乎習，則以學而言。其習一也。蓋嘗達觀習學而言。夫易之旨矣。有曰：兌以說之。又曰：說言乎兌。又曰：說萬物者，莫說乎澤，而習之為體，則本乎坎。習之為用，則見乎兌。豈不以兌之為澤，即坎水之塞其下流，二卦之義可以相通。故聖人之言，亦在相發明歟。不然，何其有似乎魯論之言也。且人之

說在乎習習而又習自然說於中心不至於樂弗止也  
夫萬物之說於秋由生而長而收而藏是習也而物有  
不說者乎物之說於秋即人之說於習也今文卿年既  
高矣學既富矣而猶拳拳以說習稱其甚懼仁之不熟  
猶五穀之不如稊稗茲吾道之有秋也方今聖人者作  
動靜會天理之要語默參闔闢之運以財成以輔相以  
左右斯民於善政善教皆可說也民說其政物說其天  
君說其民亦有文卿之說於習矣予學易故以予所得者



敷而為文卿說而魯論之義則又先儒之說在焉予不容贅者若夫說而不繹習矣而不察又聖賢所戒予與文卿尚加勉哉

白賁說

天台進士霖氏以白賁名齋求說於予弗獲讓因語之曰賁以文人所知也賁不以文人所未知也故曰質勝文則野文勝質則史可以無文為賁乎又曰賁無色也則無文斯為賁矣予嘗泛觀乎山水間有以其說山

之為山土石而已及夫春花繡地夏木成林其為賁也  
盛矣至於華者斂而為實木者落而歸根而山自若也  
水之為水江海而已及夫風行微漣雨翻巨浪其為賁  
也大矣至於風雨息而不作水波靜而不興而水自若  
也由是觀之則向之所以為文者非賁惟無文而後為  
賁也前之說易者有曰賁終反本復於無色不使華沒  
其實文滅其質也後之說易者曰此有道之賢遺去紛  
華泊然世外以質素為賁飾者也予不知士霖有取於

此乎無取於此乎誠有取於此則束帛戔戔丘園之賁  
有日矣姑俟以驗予說

蘭畹說

騷人以滋蘭比潔大夫以贄蘭為誠滋蘭止於九畹樹  
蕙乃至於百畝是蕙不及蘭也大夫得以贄蘭士惟得  
以贄蕙是蕙不及蘭也蘭之類十有五而蘭為長則其  
貴可知已蘭之種有九而數之中又有山澤之異生於  
山者可襲而不可佩生於澤者則可紉而佩也予不識

澤蘭而識山蘭即山谷所謂一幹一花而香有餘晦翁亦謂今花得古人名者宋人集其長短句亦以蘭畹顯名凡歐蘇黃秦諸公之作在焉則是蘭畹者衆芳之所聚也臨海俞餘善儒士也其質甚偉其髯甚美工於翰墨長於草聖弱冠遊浙西素學益進遂分教昌化邑以蘭畹自號俾其友徐子方氏求說於予抑聞之家語有曰與善人居如入芝蘭之室久而不知其芳則其所號實因乎字今築室以近畹則室邇而畹遐曰畹則室可見

矣易曰同心之言其臭如蘭子方其同心者歟謝家語  
曰芝蘭玉樹欲生於庭階餘善其生於庭階者歟是為  
說

拙民說

易曰白賁无咎詩云蒹葭蒼蒼白露為霜士生斯世莫  
不以機巧自為及歷世變則向之所謂巧者祇見其為  
拙爾然後動其補過之心悟其還淳之理乃甘以拙自  
居而同乎烝民噫拙非矯乎巧也民非同乎俗也乃因

其所固有行其所無事豈若鄉愿亂德者哉濂溪先生  
一賦極貶其巧而褒其拙終以風清弊絕之語其一慮  
夫民之弗能拙也古之時其民無懷葛天其俗標枝野  
鹿其居處巢穴其茹飲毛血亦自知其拙又安用巧風  
氣散而民偽滋之人用巧者惟恐弗既人惟巧是為欲  
求其拙也難矣今有人焉天資美矣世變歷矣知機巧  
之無益信拙樸之有誠不求人知而人知之不求人譽  
而人譽之若嚴生翰臣是已生名維禎世家崇德遷籍

於杭猶不忘其故里因即先世所居玉溪以自號以寓桑梓之思張光弼先生實為之傳且比德於王文固在也今復以拙民自號偕楊懋臣先生求說於予嘗聞翰臣乃松月翁之孫子壻翁乃楊補之先生之族貞居先生之弟其所聞見皆長者諸宜其有所涵養而成就也少陵有云用拙存吾道東坡亦云下士晚聞道聊以拙自修翰臣能以拙為用則其道自存能以拙自修則於道有聞也矧未晚乎今固雖未晚視前自號玉溪生時

則晚矣昔之慮者慮乎時不我與今慮者慮乎藏不我  
深其非易所謂白賁之反朴詩所謂白露為霜之遇時  
乎周鼎所指先王不與桔槔之功抱甕所羞翰臣誠無  
愧拙則無忝於民矣故為說以勗之

無心處說

操存舍亡心不可無寂然感通心不可有然則謂無者  
非耶不然也天地以無心成化人以無心應物雖謂之  
無而有網維主宰者存乎其間苟容心焉則所感狹矣



惟人之心乘乎氣機其出其入莫知其鄉然非在我者  
有以操而存之其不至於凝冰焦火淵淪天飛者幾希  
矣然以之應物則不然無思無為寂然不動所以能感  
而遂通也先儒之說易謂無心者不能感有心者不能  
咸感又曰無心之感天下之真感也觀斯二說足以盡  
無心之妙矣予友鄭敬常氏嘗有得於此故顏其居曰  
無心處又懼或人之疑其稱也俾予說以置於壁云

竹隱處士畫像贊

并序 處士諱克明字  
俊德鄭敬常之父也

處士山陰人或以為子真喬山陰固多竹子真又有  
隱名是竹隱之號其專之矣先世嘗顯於宋以直言  
廢遂終隱焉處士復以一行著克繼其隱在隱不在  
竹也處士克其容粹其言習文事而弗矜處人倫而  
過厚類有道者子修又克繼其志貌其像徵文以  
發其潛德是可嘉矣錢塘凌雲翰為之贊曰

竹可隱吾其屋隱可竹吾其麓屋匪右軍之亭麓匪子  
真之谷右軍竹而匪隱子真隱而匪竹合之則成乎二

美離之則處乎幽獨何雲飛而川逝歎斯人之莫贖望皎皎之白駒見猗猗之淇澳噫生芻一束其人如玉非斯人而疇屬

莫隱君墓誌銘

隱君名昌初名維賢字景行其得姓則以有熊氏後之季連其得氏則以莫教官後之屈生秦漢魏唐代有顯者在宋自始祖諱延瑛而下一十世由進士科仕州縣佐躋即官法從者五十四人是為吳興莫氏自始祖之

義宋刑部侍郎諱君陳而下至高祖宋承事郎諱之濱  
為六世徙居錢唐乃生曾祖諱世榮是為錢唐莫氏曾  
祖生祖諱大有祖生子四人長諱如德次諱大中君伯  
父次諱如貴君父次諱如敬君叔父君實叔父出父無  
子出而繼之者也先其叔父配孫氏於前元大德六年  
壬寅六月二十一日生君於積善里少穎悟知為學長  
益俊邁知克家自刑部至君已九世以宗遠澤斬思振  
家聲以為世楷時處士以君之善承意遂及時行樂優

游以卒歲焉君大治第西河扁其堂曰有政請處士法  
師合家族以居之同舍晉寧張翥記以先志趙雍仲穆  
為書而揭之考幹蠱之外兼以學問書無不讀藝無不  
游元初仇山村白湛淵湯北村鄧素履諸老先生者咸  
得登其門卒受教山村先生焉兼通詩傳為場屋文及  
延祐賓興時年十九以前受業一試不售則曰吾寧藏  
璞勿可再則翰林待制楊公剛中舉辟授以右職亦不  
起有別業在南山下作屋介兩山間命曰兩山始有隱

念無何二老繼歿家事日繁交友日衆而君學日富延  
名師教弟及子姪輩君亦不忘所習乃日與講明以求  
其至焉課羣僕惟責其成而已不妄加喜怒且奉已恐  
厚施人恐薄柯博士敬仲質犀帶未償頗有欲得意亟  
舉授之有要兄假君數萬緡以起家者亦無責焉矧不  
知名者胡可計其性行類此尤通佛老之教遂以廣莫  
子自號後感瓊瑄玉蟾師授以內外丹訣遂有得焉又  
和永明壽禪師山居詩一篇在叢林有傳之者篆法嶧

山碑與漢石經動有古意方外碑榜其蹟甚多具畢諸弟妹婚嫁西河第毀於災湖濱別業稍近市喧遂卜居下瀨亭扁留暉蓋用和靖詩也輯師友尺牘詩則標其名籍則詳其姓氏有元好問中州之遺意但惜不記其所交所知亦可悲矣後復徙居南屏別業其處頗多景物勝槩因人而成有若輞川之南堂者遂為廿有一題多賦之者君初以家訓不敢飲酒者殆四十年而未嘗間人之勸至是每客至始肆酣飲共醉則止尤樂於著

棋彈琴家畜法書名畫古器甚都於是盡錄其器裝為  
二帙曰雲房玩餘集若歐公金石錄焉先處士法師之  
沒既葬遂展拓先塋鼎建堂宇遠求虞道園鄧素履二  
公之文合為一碑諸士大夫因以棣華播之長句者幾二  
百餘首又自為致嚴堂記歷叙先世營置之由葬附之  
所創為送葬經營供祭之規立石堂上以示永久皇朝  
洪武三年始建學立師為英才首君以詩經為杭州府  
學訓導所教者成一鄉之俊士晚懼族譜散逸薄遊吳



興搜訪故迹歸與從子約作家傳凡先世之遺文翰墨  
附其後為若干卷曰吳興莫氏家乘及所與文敏諸子  
倡和目名茗溪紀行又嘗訪吳松故時所過題詠目曰  
雲間紀遊計平昔所為詩詞等號為廣莫子藁又有和  
陶詩集纂名物抄若干篇藏於家云君娶金華蕭氏先  
卒祔祖塋次楊氏宋后族蕭一子楊三子長海寧學錄  
次殤次孺在家女一人曰某適邢某為某官嗚呼予總  
角時嘗從外叔祖竹逕詣先生學以君嘗學琴於元之

某學詩於仇山村欲携予見竟弗果後年始長至正己亥鄉舉始得與先生交遊又獲交其猶子敬又同為杭庠訓導後為小人間君遂以疾辭予亦繼以疾辭君以年老不為腐鼠之嚇予豈一包羞者哉傳曰人定可以勝天亦盡其在己者耳思昔從仇山村游時同輩有二人焉一則張雨字伯雨以高道顯一則張翥字仲舉以名宦顯與君皆傾瀉或者以君隱名可匹顯名則道德文章而言非以地也君未厭世而慕陶潛劉伶之達而

為壙志詩則有待於觀化之歲月斯可謂之達者伶荷  
鍾以死為死陶自祭不以死為死然則隱君其死耶其  
不死耶

張宏道墓銘

公諱克用字宏道姓張氏南雄始興人唐文獻公之裔  
也曾祖諱志達祖諱華卿皆不及仕父諱舉智官至翁  
源縣尹母葉氏諱妙柔宋宣教公之女也元初父任韶  
州曲江縣主簿生公於官廨因以州名名公有兄諱某

則與公同侍養有子二人長諱成美為某府判官先卒  
次諱成德為百順巡檢公性資純厚幼已若成人好經  
史號多識前言往行有以畜積其德故所施無不當焉  
去鄉里遠母以病弗克行乃偕兄以侍兄性慈祥尤耽  
竺乾之教故克家者猶以公稱先是有強暴占據鄉里  
之田者公乃以義喻之曰凡民之田皆子孫遵於祖父  
而安且久者汝等非祖父所授欲子孫安且久者無之  
由是強暴者化歸田恐後父之任所去家千里海道之

險恒出不測每歲必一二省焉外悅父懷內慰母意雖  
間關阻隔而心志通感後父遷翁源縣尹之官未幾公  
覺以心動亟往省之而父卒居喪盡禮將暮護柩以歸  
俗尚風水之學宅兆有弗叶於卜者終莫敢葬公日夕  
籲天祈叶占卜遇智人指以地遂克葬焉初庶母馬氏  
遇公弗慈公事益謙謹及是庶母欲與所生子女為公  
弟娣留居廣州公曰豈有庶母弟妹異居乎即迎歸以  
養并撫其弟妹鄉里多之再紀至元間歲饑斗米千錢

遂發儲粟平糶乏者周之饑者食之活人甚衆元季兵  
起所在嘯聚始興地邇賊巢兼以翁源尚獠時出剽掠  
市井無賴揚言復仇欲行劫先是以告公知其狀叱去  
之曰天道福善禍淫彼為不善當自殞滅汝等有罹其  
災者命也可效尤乎衆服而退故賊寇衆益平公明於  
義理達於事變里之長幼情有枉屈求直於公郡之大  
夫訟有疑咸求決於公治家有法教子有方持己以退  
謙忤意卒無遽怒故人畏之若師保愛之者若父母稱

之者以行而不名及明洪武甲寅歲終於其家享年八十有四葬於深塘之源其孫國學生從周者以事狀俾同學柯升求銘於貢生凌彥紳曰吾祖既葬而墓未有銘恐久而失墜願先生有以銘之予雖弗及識公有孫若此其言可信不敢以老病辭遂為之銘曰

孰俾其守祖其有孰俾其發視其後深塘大阜安且厚藏之以封斯不朽

張光弼草堂疏

一笑居士在江西生為斗南望詩名優於張籍  
家計劣於陶潛欲謀數椽毋勞多說若物物之  
可與則處處之皆宜但不至於虛拘便可謂之  
實惠此崢嶸事在特達心

右伏以昌黎寄玉川子首稱洛城破屋之數間東坡題  
綠筠軒終比揚州纏腰之十萬必能修我牆屋方可有  
此室廬緊惟博愛乃見義勇家徒四壁之立囊無一錢  
之留人皆見之計必出此若非慷慨而多助安得輪奐



之一新必欲取杜工部草堂貲何時可辦倘茸得楊關  
西槐市塾今歲無憂諸賢圖之名教事也

仙林方外交疏

仙林山何處飛來有如竺國清潭水此時流出不減曹  
溪要看教闡慈恩須用法傳嫡嗣講主訥公大辯若訥  
不違如愚坐百部堂中親傳正印向三生石上頓悟前  
身欲效達磨面壁九年好為道翁拈香一瓣口手相應  
衣法雙行真成青出於藍不是麋邊之鹿允符輿論大

振宗風禮西方諸佛之尊辰良日吉祝南面一人之壽  
地久天長

重建觀音寶殿疏

獨峯村金佛寺舊有白衣顯跡今則焦土空存  
欲輪奐一新威儀再覩將為無邊之大刹特化  
有緣之善人不免徧扣高門共成勝事

右伏以家家有觀世音即心是道種種行方便事入手  
為財若得衆姓結緣便是普門示現惟金佛事類紫竹

林梵音海潮之風聞甘露法雨之時澍曩經風火悉化  
虛空象教為之寂寥龍神冒從恭敬今欲鼎新大殿咸  
觀法身寶珠瓔珞之莊嚴華蓋幢幡之供養奈赤手空  
拳之何補俾白衣妙相之莫瞻必須指廩捐金便可伐  
木運土多助寡助大書特書晨香夕燈上以祝九重之  
萬壽晝禮夜誦下以錫五福於庶民正當可為切莫蹉  
過謹疏

重修後澗溪神霄雷院疏

錢唐施道元者久慕清靜未打勤勞欲成經營  
之功庶助焚修之力是誠報本匪別生枝人辦  
肯心我無難事

右伏以駕麟持妙法九天氣到手如無騎鶴上揚州十  
萬貫纏腰未有惟後澗溪之雷院乃古仙子之雲房屢  
變易於星霜遂震凌於風雨幸有投機之會便為入道  
之門必遇捐金指廩之人方就運斧揮斤之事既一舉  
而兩得且廣種而薄收請禱於上下神祇況可周人之

急觀像而恐懼修省是為敬天之威相與圓成廣賁利  
益謹疏

募緣建真武菴疏

瀛蟾道人欲於超然山建菴祀真武神朝夕焚  
修上以祝延聖壽下以保安庶民奈赤手以難  
成必衆力之是賴敬持疏語歷扣賢門快為點  
頭便能遂意

山號超然欲奉玄天上帝室曰完矣須憑白水真人有

此未了善緣須作現成活計。睦仁和之為里，皆士庶之所居。神非人，莫能顯其靈；人非神，無以安其業。自武當降神之後，於杭郡祈福所先。碧瓦朱甍，照城郭雖無似此之規模；晨鐘暮鼓，羅幡幢須作如斯之供養。必得捐金指廩，便能橫棟駕梁，會看五穀之登，咸賴一人之慶。世傳甲乙譜經之營之家，有壬癸神福汝佑汝德，無不報功有所歸。

無能道人結草菴疏

無能道人欲結草菴以延瓢笠奈乎赤手空拳  
不免遍扣高門共成勝事

右伏以石屋洞前穩便處正宜著脚草團標內定靜中  
方可明心欲悟青牛老子之玄玄須仗玉蟾真人之止  
止奈無腰纏十萬貫徒有口誦五千言必須得大力量  
人方可成好機會事多助寡助經之營之但得地可卓  
錫不管室如懸磬冬裘夏葛若能聚衆友以學仙晨香  
夕燈便可祝兆民之賴慶他時佳話此日抄題

沈谷華入道結菴疏

右伏以人間赤松遊此平生之素志牀頭黃金盡惱壯  
士之愁懷自憐生龜脫筒却類鮎魚上竹形雖落魄性  
頗風流從師學業作成七字對五言詩為客起家引得  
半生忙十年閒未養黃芽白雪先歌流水高山向刀鎗  
陣裏常有陰德濟人於簿書叢中絕無私情累已偶悟  
黃梁之夢還思白髮之親打筋斗跳出利名場粧軀老  
作個呆癡漢悞蒙人舉親覲天顏登臺省皆袞袞之諸



公歸田園獨遑遑之一老能向急流勇退不是踏脚空  
回幸蒙鄉里心交喚作市廛骨董道是沈休文不覺腰  
圍之瘦損謂之陶元亮何曾心地之遠偏且分以財用  
成其室只消纏腰十萬貫便見蓋頭一把茅必發歡喜  
心願成方便事彈絲品竹招邀風月兩閒人指廩捐金  
成就溪山一道士聊為咨目權作疏頭

岳王廟化緣修理塑馬疏

伏以凌烟生面完之又是百年追電輕蹄塑者已非一

日況丹青易為慘淡奈土木久致崩摧孰瞻在天之靈  
竟失行地之用必期多助庶可有為若鐵鎗之勇著於  
王彥章比泥馬之靈顯於崔子玉一舉兩得異世同符  
偕四將成中興烜赫炎精之焰參六飛為上駟肅清朔  
漠之塵茲以勸忠幸為仗義

吳山東嶽廟化鐵四太尉疏

吳山東嶽廟鐵四太尉一曰靈應侯二曰福祐侯  
三曰忠順侯四曰順祐侯以禦災厄悉皆以鐵

肖像顯靈非一日矣因軍器造作人人有欲假  
為用者一夜託夢於王子澄曰吾欲助國將作  
新吾像以離於此已而果為國用子澄識其語  
不忘果蒙神庇動止協吉茲不忘神德不敢自  
私欲求衆力圓成庶見神功昭著願為勝事實  
在喜心

右伏以鐵四太尉五百年著山嶽之靈金九河圖億萬  
載全生成之妙豈其報國遂至喪軀雖臭腐化為神奇

必輪迴定有劫數既蒙大力敢昧初心若得靈應福祐  
忠正順祐四侯之像存必享福壽康寧好德考終五福  
之咸備如蒙加筆必有禎祥

柘軒集卷四

欽定四庫全書

柘軒集卷五

明 凌雲翰 撰

詞

鳴鶴遺音

蘇武慢

并序

世傳全真馮尊師蘇武慢廿篇前十篇道遺世  
之情後十篇論學仙之事道園先生謂費無隱  
獨善歌之則能知者亦罕矣及觀先生所作非

惟足以追配尊師而使世之汨沒塵埃流連光  
景者聞之而有遺世獨立羽化登仙之想則是  
篇於世其可少乎著雍閏茂之歲燈夕後三日  
偶閱道園遺稿欲盡和之甫成一篇輒為韻拘  
筆弗得騁於是行思坐惟或得一句一韻索紙  
書之越三日又成四篇尚少大半意殊悶悶廿  
三日城南醉歸擁爐孤詠連得四篇半興未已  
而夜寒手龜不能足也明日更成二篇半并無

俗念一篇凡十又三篇覽者幸為正焉

雲縷虹竿月鉤星餌海上金鰲曾釣蓬島連根崑崙無  
外不比人間嵩少返本還原成功滿行坐待紫皇飛詔  
笑令威千歲來歸知換幾番華表誰曾伴阿母重遊  
蟠桃再結目斷西飛青鳥林屋無扃洞天不老鐵笛一  
聲雲杪皎皎靈臺熒熒明鏡塵土等閒昏了看火輪飛  
出扶桑萬戶千門皆曉

智不如愚辯何如訥大巧又何如拙螳黠蟬癡鶴長鳬



短總是一番消歇逝者如斯撓之不濁止水本來明徹  
君試看雲散天開見出自家秋月誰種得白雪黃芽  
交梨火棗不怕北風吹裂頭上簪花手中拍板稽首金  
銀宮闕見說麻姑高騎鵬背載酒過門相謁便呼童拗  
折松枝掃取一庭殘雪

玉砌雕闌朱門紫陌爭似道人茅宇樽有新醪盤無兼  
味自傍小溪垂縷富貴何淫貧賤亦樂此外更無他語  
有時將明月為家或共白雲為侶還俯視六合之間

茫茫何物不入靈臺丹府綠水青山野花啼鳥已把此  
心留住夢熟黃梁塵飛滄海轉首便為千古問雪堂歸  
去何時江上一犁春雨

芳草纖纖游絲冉冉可愛地晴江碧世事浮雲人生大  
夢岐路謾悲南北漉酒春朝步蟾秋夜却憶舊時巾舄  
問故園何日歸歟松菊已非疇昔誰似我十畝柔桑  
千頭佳橘飽有綠陰朱實溉釜烹魚飯疏飲水勝咀絳  
霞瓊液鳥倦知還水流不競喬木且容休息喜閒來事

事從容睡覺半牕晴日

破帽多情布帆無恙興盡便尋溪轉明月來時浮雲飛  
盡千古翠屏宜晚桂棹蘭漿荷衣芰製偏稱藥爐經卷  
看輕鷗點破長烟一望水連天遠 嘗記得雪滿山陰  
舟回剡曲何必過門相見浩氣難消哀情誰會萬里碧  
空橫劍一道虹橋半天龍駕尚憶幔亭開燕要長生須  
出人間未卜道緣深淺

身在雲間目窮天際一帶遠山如格隱隱迢迢霏霏拂

拂蔓草寒烟秋色數著殘棋一聲長嘯誰識洞庭仙客  
對良宵明月清風意味少人知得君記取黃鶴樓前  
紫荊臺上神有青蛇三尺土木形容水雲情性標韻自  
然孤特碧海蒼梧白蘋紅蓼都是舊時行跡細尋思離  
亂傷神莫厭此生歡劇

霧駕雲輶雨中風帽一劍凌風飛過下視茫茫遙觀歷  
歷不復更知天大日月居諸春秋代謝幾見授衣流火  
記岳陽三度曾遊未必世人知我游戲處柳樹為徒

榴皮作字聊說行藏如左列豹重關封狐千里不滿楚  
人哀些瓦礫黃金蓬萊別館歸去有誰知那不須分天  
上人間南北東西皆可

驢背馱詩鴟夷盛酒曉踏蘇堤殘雪露闕雲門璇階玉  
宇照耀日華光潔見說孤山猶存老樹清興一時超越  
畫船歸更有漁舟此景頓成奇絕 還四顧表裏通明  
高低一色塵土不容毫髮却憶韓卽花開頃刻誰得染  
根仙訣雪後園林天開圖畫眼界迥然俱別待黃昏約

取林逋湖上朗吟香月

醉裏閒吟興來獨往山靜悄無人語兩岸桃花一溪春  
水似憶仙源無路花上鶯啼雲間犬吠偶到洞仙琳宇  
便相留閒話長生嗟我委形非故圖畫裏昔日天台  
當年劉阮此說荒唐無取避世秦人放舟漁子却恐偶  
然相與嶺日將沉林風忽動吹落半簾紅雨待少焉月  
出東方柱箇瘦藤歸去

有酒無穀奈良夜何客有鱸魚相惠如此山川幾何日

月三國竟成何事目斷風帆江空歲晚覓句謾思無已  
怕多情笑我華顛甚矣吾衰久矣客知夫水與月乎  
盈虧如彼逝者有如斯水舟放中流聽其所止夜久江  
流聲細鶴為予來客辭予去予亦就眠蓬底忽羽衣過  
我林臯驚覺一番殘醉

仙客難逢白雲誰掃知是採芝何處皓鶴歸來金雞啼  
罷夢斷聞風玄圃松下高歌橘中殘著飢後自餐龍脯  
待偷桃曼倩重來為問木公金母君不見洞裏桃花

花間啼鳥又是一番春暮弱水三千巫山十二指點虛  
無歸路君抱琴來我邀君飲我醉欲眠君去向人間遊  
遍朱門靜看只如蓬戶

君實園中堯夫窩內獨樂正同安樂維水泱泱予懷渺  
渺西望每思伊洛草色隨車花香襲屨風景至今猶昨  
被杜鵑啼破天津便覺市朝蕭索誰復見萬古龍門  
三春桃浪衝岸紫鱗爭躍月到風來水流山在安得二  
賢同酌心上經綸鑑中治亂歎息九原難作笑紅塵逐



利爭名總是蠅頭蝸角

無俗念

等閒屈指算今來古往誰為英傑耳目聰明天賦予怎  
肯虛生虛滅去燕來鴻飛鳥走兔世事何時歇風波境  
界大川不用頻涉踏遍萬戶千門五湖四海一樣中  
秋月正面相看君記取全體本來無缺空裏非空夢中  
真夢莫對癡人說便須騎鶴夜深朝禮金闕

木蘭花慢

賦白蓮和  
宇舜臣韻

悵波翻太液誰留住  
藥珠仙向水殿雲廊  
玉容花貌幾度爭  
鮮人間延秋無計掩  
霓裳猶憶舞便娟畫  
裏傾城傾國望中非  
霧非烟鴈飛不到九  
重天水調謾流傳奈  
花老房空的存心苦  
藕斷絲連西風環珮  
輕解有冰絃誰復記  
華年留得錦囊遺墨  
魂消古汴宮前

滿江紅

詠梨花  
鳥圖

誰寫瓊英空驚訝  
年華虛度依約似清  
明池館粉容遮路  
蝴蝶又來叢裏鬧  
鷓鴣還占枝頭語  
向東闌惆悵幾

回看愁如許 疑有月光搖樹疑是雪香生處自洗粧  
人去淒涼非故白髮宮娃歌吹遠青旗酒舍詩吟苦記  
黃昏燈掩重門聽春雨

蝶戀花

杏莊為莫  
景行題

一色杏花三百樹茅屋無多更在花深住旋壓小槽留  
客醉舉杯忽聽黃鸝語 醉眼看花花亦舞風落殘紅  
飛過鄰牆去恰似牧童遙指處清明時節紛紛雨

蝶戀花

過雨春波浮鴨綠草閣三間人住清溪曲舊種小桃多  
似竹亂紅遮斷松邊屋有客抱琴穿翠麓隔水呼舟  
應是憐幽獨歷歷武陵如在目幾時同借仙源宿

風入松

和月建塔  
助教韻

誰教齒豁更頭童從喚作衰翁惜花已自因花瘦况飄  
零萬點隨風須信人生如夢休言世事皆空紫騮嘶  
過畫橋東猶記軟塵紅重來綠遍西湖路消魂是杜宇聲  
中經眼倚粧飛燕傷心照影驚鴻

獅兒詞

賦梅和仇  
山村韻

蹇驢破帽知是幾度尋春  
山南山北惆悵亭荒仙遠苔  
枝空綠村醪正熟為花醉  
何妨留宿春光似怕人冷落  
先回空谷 瀟灑生意自足  
有高標不厭矮籬低屋與  
雪相期側耳隔牕蟲撲晚晴  
縱步又還信一枝筇竹莫  
嫌獨月在畫闌東曲

瑤華慢

賦雪

喜深驚密試問滕神有多少  
寒力如圓似瑩總疑是滿

眼隨珠和璧五更書幌早已覺寒光穿隙料禽影波上  
漸稀徑裏悄無行跡 有人獨倚危樓望千里江山高  
下同色坡仙飲處甚頽然不減醉翁賓客等閒評論等  
柳絮梨花非白畫堂深弦管方調一任低垂簾額

商角調定風波

賦崔鶯鶯傳

把麗情分付良工傳奇謾為重省開戶迎風拂花動月  
寫盡西廂景笑書生最僥倖剛道師婚勝琴聘况靜問  
姓名非是近時三影 空思遮境畫鹽梅不濟調羹鼎

翻殘金舊日諸宮調本纔入時人聽減容光懶窺鏡鳳  
枕鴛衾與誰重贈李紳歌意續微之詠

鳳凰臺上憶吹簫

賦鳳  
仙花

菊婢標名鳳仙題品紛紛隨處成叢甚玉釵渾小寶髻  
微鬆依舊花分五彩毗陵畫總付良工誰為伴雞冠染  
紫鴈陣來紅玲瓏英英秀質多想是花神剪綵鋪茸  
却易分高下難辨雌雄疑把守宮同搗端可愛深染春  
蔥開還謝從風亂飄好上梧桐

沁園春

胡毘季  
析居

樹上凌霄堂前紫荊秋來尚芳奈牝雞晨語鵲鴿憔悴  
妖狐晝嘯鴻鴈分張仁智非周憂喜非舜一旦天倫忍  
遂忘如何好望松楸感泣桑梓悲傷古今禍起專房  
總一國猶然况一鄉家有婦人豈無長舌世無男子誰  
有剛腸樹大分枝瓜熟蒂落此語應非是義方聊書此  
要懲鑑誠不在文章

木蘭花慢

壽姪云達時七  
月十四日也



問初秋明月更一夕十分圓喜鴻鴈行中居然生子者  
目娟娟祇今年踰弱冠遇生朝剛要賦詩篇莫學汝家  
癡叔蹉跎已傍中年博山風裊水沉烟絳蠟照華筵  
有檀板歌詞金樽勸酒銀甲彈弦階庭舊時玉樹正朱  
顏綠鬢似神仙丹桂不妨似竇紫荊還見如田

風入松

壽郭仲和

傳家應自郭汾陽餘裔在錢唐傍人莫笑儒酸在親曾  
接駕鷺班行羸得身心穩住鬚鬢却蒼蒼中和相隱

舊書堂絃誦樂時康  
梅花枝上春猶小  
朋簪盞次第稱觴  
莫問商瞿年紀也  
須載弄之璋

一剪梅

壽俞子  
中紫芝


蒼顏白髮稱烏紗  
瘦似黃花清似梅花  
牕吟山月樂無涯  
知是儒家知是仙家  
紫芝服食勝胡麻  
不愛繁華却愛年華  
詞成筆底走龍蛇  
壽酒流霞壽氣成霞

浪淘沙

賦元夕遇雨  
次俞紫芝韻

雨打上元燈  
無處邀朋何如牕下  
且曹騰謾憶牙旗穿

夜市鐵馬春冰 歌舞有人曾倦與爭能越羅裁服換  
吳綾盡道先生歸隱也烏帽烏藤



柘軒集卷五